



UNIVERSITÄTS-
BIBLIOTHEK
PADERBORN

Universitätsbibliothek Paderborn

Brevis Institutio De Salvatri Poenitentia Peccatoris

Viexmont, Claude de

Coloniae Agr., 1725

VD18 1361598X

Sexta Pars De Peccatorvm Venia Non Desperanda.

[urn:nbn:de:hbz:466:1-50113](#)



INSTITVTIONIS PARAENETICAE AD POENITENTIAM.

SEXTA ET VLTIMA PARS,
DE
**PECCATORVM VENIA NON
DESPERANDA.**

QVOD OMNES PECCATORES
SVMVS, ET DEI MISERICORDIA
INDIGEMVS.

CAPVT PRIMVM.



Exto & vltimò dicis, quòd mai-
or est iniquitas tua, quam vt
veniam merearis: ideoque de
damnatione tua securus, de
agenda pœnitentia non es so-
licitus. R. Tibi plurimum
congratulor, frater charissime, & Deo, quas
possum, ago gratias, quòd non es sicut plerique
hominum, qui peccant assidue, tamen se ne-
sciunt peccare: qui semper prauè agunt, &
nunquam retractant quæ egerunt, qui omne
quod faciunt, cæca mente pertransiunt, & sta-
tum

Peccati
agnitio, ini-
erum salutis.

tum suum priusquam puniti fuerint, non cognoscunt. Quid autem infelicius, quam infelicitatem suam non cognoscere, & inter ipsa vitae discrimina nullum infirmitatis dolorem sentire, & ægritudinem suam ignorare? Ita & nobis nihil est periculosius, quam non cognoscere, dum peccamus. Iam in te est salutis initium, quod agnoscis peccatum tuum: non parvus iam tibi est accessus ad æternam illam felicitatem, quod tuam agnoscis infelicitatem: iam internæ munditiae concordas, quod internam tuam immunditiam non negas. Tantò enim ante oculos Dei quis sit pretiosior, quanto ante oculos suos fuerit despectior. Nisi te ipsum peccatorem arbitrareris, deterius peccator efficereris: deflendus es, si te ipsum non defleres: si de te tibi sufficere consideres, à Deo, qui sibi verè sufficit, deficeres. Misericors & miserator Dominus te miserando præueniens, ob mentis tuæ oculos peccata tua ob*Deus pec-*
cata nostra
nobis offen-
dit.

iiicit, & quanta poena tibi pro his in futuro immineat, prædicit: omni via omnibusque mediis, occasionem tibi præbens conuersionis. Ut saltem ad se conuertaris poenæ timore, qui id non faceres sui amore: paulatimque timorem seruilem in amorem conuertas filialem. Si Dominus Deus peccata tua districte ferire vellet, ea tibi deflenda non præsentaret. Ea etenim tibi præsentat, ut de iis doleas, & per veram poenitentiam funditus deleas, ut dum ea punieris in præsenti saeculo, nullus eadem puniat in futuro. Hæc est illa Dei misericordia peccatores præueniens, ut à peccatis suis resurgent.

N 5

Ne-

Misericor-
dia preue-
niens pecca-
tores.

Nemo sine
erimine vi-
uit,

Notandum.

1. Ioan. 1.

Omnis
peccatores

Iob. 15.

Iob. 4.

Psalm. 142.

Psal. 18.

Psalm. 31.

Nemo est tam circumspectus, quin aliquando in peccatum sit collapsus: ideoque Deus nostram sciens imbecillitatem, huic necessitati (cui imbecillitas carnis subiecta est) pœnitentiæ adhibuit medicinam. Peccare est humum, in peccatis vero permanere est diabolicum: quandiu fragile istud corpus gerimus, sine peccato esse non possumus: nemo potest dicere, mundum est cor meum, purus sum à peccato. Si autem dixerimus, quia peccatum non habemus, nos ipsos seducimus, & veritas in nobis non est, quia in multis offendimus omnes. In mundo esse non potest sine culpa, qui in mundum venit cum culpa; qui in iniquitatibus conceptus est, sine iniquitate viuere non potest: in hac peccati carne, nemo sibi potest libertatem à peccato vendicare. Nemo viuit sine peccato, sed ne infans quidem, cuius est unius diei vita super terram: cœli non sunt mundi in conspectu Dei, sed & in Angelis suis reperit prauitatem, non iustificabitur in conspectu Dei omnis viuens. Multa in nobis peccata quotidie deprehendimus, nec tamen scire possumus quoties peccamus. Etenim delicta quis intelligit, ideo subditur: Ab occultis meis munda me, Domine. Quia igitur nemo est qui non habeat peccatum, solus ille est, verè beatus, cui peccatum suum non imputauerit Dominus, & cui remiserit impietatem peccati sui. Sufficiat nobis ad omnem iustitiam eum habere propium, cui soli peccauimus. Omne quod ipse nobis non imputare decreuerit, sic est quasi omni-

omnino non fuerit: quis enim eos accusabit,
quos Deus absoluit? Ne quis autem quasi in-
nocens sibi placeat, & se extollendo plus
pereat: necessariè & salubriter admonetur
quòd peccat quotidie, dum pro peccatis suis
quotidie iubetur orare, dicens: *Dimitte nobis Matth. 6.*
debita nostra, sicut & nos dimittimus debito-
ribus nostris.

Cùm quis verbum contra auaritiam au- Recidimus
dit, corde compunctus eandem auaritiam odit, ^{subinde.}
rerum omnium laudat contemptum, & non
plus quam arenam deputat aurum. Sed mox
ut eius animus viderit, quod concupiscat, id
iam obliuiscitur, quod laudabat. Sæpè de pec-
catis nostris conterimur & confitemur, tamen
mox ad eadem peccata reuertimur: plerunque
vitam nostram ipsi reprehendimus, & tamen
libenter agimus, quod in nobis reprobamus.
Ad iustitiam spiritus nos erigit, & ad peccandi
consuetudinem caro restringit: delectationibus
carnis mens renititur, sed protinus delectata
captiuatur. Væ etiam laudabili vita homi-
num, si remota pietate iudicentur, quia sæpius
inde corruunt, vnde ante Dei oculos se place-
re suspicantur. Sæpe iustitia nostra ad exa- Deus non
men diuinæ iustitiæ deducta, iniustitia est: for- agit no-
detque in conspectu districti Iudicis, quæ in biscum sum-
oculis fulget operantis. Omnes iustitiae no- mo iure.
stræ sunt velut pannus mulieris menstruatæ. Si Isaïe 65.
vita nostra districtè examinaretur, in tremendo
illo examine nullus iustus inueniretur: Si
Deus solummodo ostenderet seueritatem, & in
iudicio suo non adhiberet pietatem: si inqui-
tates

tates obseruaret, & peccatoribus veniam dengaret: nemo æternæ felicitatis gloriam expectaret, nemo districti examinis rigorem ferre sufficeret. Nisi misericordia Dei super omnes extenderetur, nulli vñquam saluarentur. Nam sicut hos sua non potuerunt creare merita, ita nec eos saluare potest sola sua iustitia; qui cunque saluatur, magis ex Dei misericordia quam proprio valore suorum meritorum saluatur.

Superbis
expedit ca-
dere.

Simile.

Tibi forsitan sicuti & superbis expediuit cadere, vt qui priùs extra teipsum in elationem efferebaris, cui ex peccato conditioni es- ses obnoxius, etiam nolens & coactus recordareris: infirmatusque quid es, cognosceres, & propriæ præsumptionis fastum deponeres. Et sicuti pro modico luto uestem non mundas, sed quoadusque plus luti contraxerit, expectas, ita & in grauiora peccata lapsus es, vt etiam leuiora dilueres. Maior enim culpa quò citius agnoscitur, eò celerius emendatur: minor verò dum quasi nulla creditur, eo peiùs, quò & securius in vsu retinetur, tandemque mens malis minùs grauibus assueta, ne grauiora quidem exhorrescit, atque ad quandam authoritatem nequitiae per culpas nutrita peruenit, tantoque magis in grauioribus contemnit pertimescere, quantò magis in leuioribus didicit non timendo peccare.

Itaque, frater charissime, ne diffidas, ne desperes, ne animo concidas, in peccatum quidem corruisti, sed inde potes resurgere: Deum offendisti, sed cum per paenitentiam potes placare.

care. Dederat tibi præcepta, ne peccares, & tamen peccanti dedit pœnitentiæ remedium, ne desperes: quantumcunque peccaueris, parcer tibi Dominus, si pœnitueris.

QVOD NVLLVM EST PECCA-
TVM TAM GRAVE, QVIN PER
VERAM POENITENTIAM SIT
REMISSIBILE.

CAP. II.

AT dixeris, Sed ego Deum super omnem hominem offendit, & super numerum arenæ maris peccavi: multa peccata mea eius generis sunt, de quo Matthæi duodecimo dicitur: Si quis peccauerit in Spiritum sanctum, non remittetur ei neque in hoc sæculo neque in futuro. Maior est iniquitas Genes. 4. mea, quam ut veniam merear. R. mentiris, frater charissime, sicut & Cain: maior est Misericordia Dei infinita, peccata autem tuae impietas: maior est Dei misericordia, quam tua miseria. Potes de peccatis tuis consequi veniam, quia Dei bonitas finita. humanam vincit malitiam. Peccata omnia ab origine mundi commissa qualitate & numero sunt finita, Dei autem misericordia nec numerum habet, nec mensuram, ideo peccatorum omnium numerum superat & grauitatem: plus potest Deus parcere, quam omnes homines possint peccare. Peccata omnia si ad Dei conferantur misericordiam, sunt quasi una guttula ad totam maris aquam: & quasi tela araneæ, quæ nusquam comparet vento flante.

Magnis

Magnitudinem morbi tui vides, & potentiam
Medici non vides: ideoque peccatis tuis de-
speras veniam, iisque Dei comparas miseri-
cordiam. Nihil aliud est desperare, quam
Deum peccatis suis comparare. Si Deus pec-
catorum magnitudine vixtus non potest igno-
scere, detrahis ei omnipotentiam: si non vult
quod potest, cum facis mendacem, qui id præ-
stare nolit, quod toties per ora Prophetatum
promisit. Ego sum, (inquiens) qui deleo ini-
quitates tuas, & memor non ero, tu autem me-
mor esto.

Desperare
quid sit.

Esaie 43.

Desperatio
maximum
peccatum.

Iudee de-
speratio.

Peccatum
nullum est
irremissi-
bile.

Ezech. 33.

Plus de te despero quia desperas, & te
plus de desperatione, quam de aliis peccatis tuis
damnas: ipse te in æternum perimis, qui apud
patrem misericordiae ad pœnitentiae remedia
non recurris. Animæ mors est peccatum ali-
quod perpetrare, eius verò desperare veniam
est in infernum descendere. Hinc Iudas ma-
gis Deum offendit, in eo quod per desperatio-
nem seipsum suspendit, quam in eo, quod per
malitiam eum tradidit. Desperatio reddit ho-
minem maledictum, & protectione Dei in-
dignum.

Sed ne forte hinc colligas desperationi tuæ
aliisque peccatis tuis non esse paratam Dei mi-
sericordiam, sed iis quedam duntaxat, qui le-
uia peccata admiserint; audi Dominum clara
voce pollicentem, Quacunque hora ingemu-
rit peccator, omnium iniquitatum eius non
recordabor. Nullum criminum genus exci-
pit, nec multitudinem aut magnitudinem pec-
catorum perpendit, qui omnia omnium pec-
cata

cata redemit, eorumque remittendorum potestatem Sacerdotibus suis sine ulla exceptione concessit. Tantum ingemisce & conterere, & parata tibi est omnium superiorum peccatorum obliuio: si multa & magna sunt peccata tua, multa & magna est Domini misericordia. Miserebitur tui Dominus secundum magnam misericordiam suam, & secundum multitudinem miserationem suarum delebit multitudinem iniquitatum tuarum.

Quod autem obiicis mihi illud Matthæi duodecimo, Si quis peccauerit in Spiritum sanctum, & cætera. R. Peccatum in Spiritum sanctum (id est, quod fit ex certa malitia contra bonitatem & misericordiam Dei, quæ peculiariter attribuitur sancto Spiritui) ideo dicitur irremissibile, quia directè obuiat Dei bonitati & misericordiæ: quæ & remissionis peccatorum est principium, sicque id excluditur, per quod remitti debet peccatum: sicut & morbus dicitur incurabilis, qui directè tollit remedia curationis. Peccatum illud irremissibile dicitur, non quin pœnitenti remittatur, sed quia, qui sic peccauerit, de misericordia Dei aut desperat aut præsumit, sicque peccatis alia peccata addit: ideoque in malis suis obstinatus, sicut vix & raro peruenit ad pœnitentiam, ita & peccati sui vix & raro consequitur remissionem. Sed de nullo peccatore despontum est, quamdiu Dei patientia eum adhuc ad pœnitentiam expectat, nec eum adhuc ex hac vita eliminat. Paganus aut Iudæus est hodie, nonne cras fieri potest Christianus? hæreticus

Peccatum
in Spiritum
sanctum.

Peccatum
irremissi-
bile.

Peccatum
irremissibile
quid sit?

De nullo,
quamdiu
viuit, est de-
sperandum,

reticus est, quid si cras sequetur catholicam veritatem? schismaticus est, cur non cras amplecti poterit catholicam pacem? Nemo igitur est desperandus, quamdiu in hac vita est constitutus, quia nonnunquam pœnitentia, quæ diffidentiâ ætatis differtur, consilio matuore perficitur. Donec in hac vita sumus, nullum est peccatum, nulla est iniquitas, quæ non pœnitentiæ medicamento sanetur, si conuersio pura & sincera habeatur. Quod peccatum grauius esse potest homini ægrotanti, quam imperfectio sui Medici? quòd si ei dimittitur, quid non dimittitur? Christus in cruce pendens pro crucifixoribus suis Patrem rogauit dicens: Pater, ignosce illis, quia nesciunt, quid faciunt. Si salutis spes illis reddita est, à quibus Christus occisus est: quis iam de sua salute desperet? Dominus etiam Iudam, qui eum tradiderat, ad pœnitentiam & implorandam misericordiam inuitabat, dum suæ proditionis eum præmoneret, & pedes ei sicuti & aliis ablueret, dum eum vocaret amicum, & oblatum ab eo exciperet osculum. Si Christus crucifixoribus suis non solum pepercit, sed etiam pro iis patrem rogauit: si Iudam inuitauit ad pœnitentiam, quanto magis pœnitenti tibi dabit veniam? Tu suæ maiestatis es adorator, non sui corporis intercessor: suæ mortis venerator, non suæ passionis derisor: suæ misericordiæ contemplator, non suæ infirmitatis contemptor, & apud eum tibi desperas veniam, & peccatorum tuorum remissionem?

**Crucifixori-
bus parci-
tur.**
Luc. 23.

**Iudas ad
pœniten-
tiā inuita-
tur.**
Ioan. 13.

Ita-

Itaque, frater charissime, à spei firmitate Desperan-
nulla te peccatorum tuorum qualitas, nulla te dum de nul-
frangat quantitas: etiam si commisisses omnia lis peccatis.
peccata, quæ ab origine mundi sunt commis- Pœnitentia
sa: ne sic quidem eorum deberes desperare vis.
veniam, quia Dei bonitas humanam vincit ma-
litiam. Si tantum peccare potes, quantum
Deus bonus est, per me tibi licet, ut despe-
res. Quod cum fieri non possit: qui de te
malo desperas, de Deo te meliore confidas.
Peccasti, peccati pœnitentia te: millies peccâ-
sti, millies pœnitentia te. Pœnitentiam age,
& appropinquabit tibi regnum cælorum.
Deus ad pœnitentiam non hortaretur, nisi pœ-
nitentibus veniam polliceretur. Inter com-
pletam pœnitentiam & regnum cælorum,
nihil est intermedium: age pœnitentiam de
peccatis tuis, & in momento patebit tibi ia-
nua cælestis. Peccata tua separant inter te &
Deum: quæ obstacula si per pœnitentiam tol-
las de medio, iam adhærebis Deo, vnusque
spiritus eris cum eo. Dignos fac fructus pœ-
nitentia, & contraria contrariis redime: & qui
antea agebas contraria Deo, nunc contraria
agas diabolo.



CAP. III.

Via vitæ.
Cur pauci
viam vitæ
inueniant.

Vix iustus
saluabitur.

AT obiicies mihi illud Matthæi septimo, Angusta porta & arcta via est, quæ ducit ad vitam, & pauci, qui inueniunt eam. Et primæ Petri quarto, Si iustus quidem vix saluabitur, impius & peccator ubi parabunt? R. Verum quidem est, frater charissime, quod pauci viam vitæ inueniunt: sed unde hoc? certè quia pauci eam querunt. Omnis autem, qui querit, inuenit; omnis, qui petit, accipit, & omni pulsanti aperit. Quis ergo eam non inuenit? quis non accipit? aut cui non aperitur? certè et tantum, qui non querit, qui non petit, aut qui pulsare negligit. Quod autem vix iustus saluabitur, hinc est, quod ex sua iustitia nemo salute dignus inuenietur; non enim ex operibus iustitiae, quæ fecimus nos, sed secundum gratuitam suam misericordiam Deus nos faciet saluos. Diuini est muneris, non nostri per se operis, quod saluamur: nihil enim est tantillum boni operis, quod etiam Deus operatur in nobis, si ad æternam illam beatitudinem conferatur. Cæli iustorum tantum sunt per diuinæ iustitiae rigorem: sed ut mnes salui fiant, peccatorum etiam facti sunt per diuinæ gratiæ largitatem. Christus nobis omnibus paradisum meruit, & sua morte paternam hæreditatem nobis restituit. Omnes vocat ad cæle-

cælestē illud conuiuum, discubentibus vult Luce 14.
impleri suam domum: etiam debiles, cæcos &
claudos compellit ingredi, vt à cælestibus illis
& perennibus gaudiis nemo significetur ex-
cludi. Numerus Sanctorum, semper de nu-
mero auctus est peccatorum.

Sed quoniam plus mouent exempla quām Ab exem-
verba: supereſt, vt qui verbis meis non accen-
deris, ſaltem exemplis aliorum exciteris, vt cūm
videris multos per ſpatiosam viam (quæ eos
duceret ad perditionem) aliquando ingressos
eſte, & poſtea arctam viam (quæ ducit ad vi-
tam) inueniſſe, eam itidem non desperes in-
uenire: & cūm multos iniustos per Dei gra-
tiam iuſtificatos & ſaluatoris videris, tu itidem
non abiicias ſpem ſalutis.

Aaron post conſlati vituli pœnitentiam à Aaron.
Exod. 28.
Maria.
Numeri 12.
Deo in ſumnum delectus eſt Sacerdotem. Ma-
ria ſoror eius poſquam lepra percufſa eſt, quia in Moysēm murmurauit, accepta pœnitentia
fanata eſt, & priſtinam prophetizandi gra-
tiam recepit. Dauid Rex & Prophetā erat, Dauid fag-
cinus.
eum ſecundūm cor ſuum Dominus inuene-
rat, & ex eius ſemine Christum naſci-
rum promiferat: at in quām fœdum cri-
men, & quām multiplex, vir tantus pro-
lapsus eſt? Audiuit à Prophetā Nathau pro-
lixas Domini minas grauemque uitionem,
& totam illam Dei iram duobus verbis vertit
in misericordiam. Peccauī (inquit) Domino. Nota.
Ac mox non ſolūm à Prophetā audire meruit,
Tranſtulit abſ te Dominus peccatum, ſed etiam

O 2

quem

quem peccando amiserat, prophetiæ recepit spiritum: posteris suis eius profuerunt merita, & propter Dauid seruum suum Deus multa ab Israël auertit mala. Durus erat Achab, sèpè obiurgantem Dominum contempserat, sceleribus sceleribus accumulárat, & occiso Naboth, vineam illius occupárat: tandem atrocibus Dei minis perterritus, & scelerum suorum conscius pœnituit, cilicio & ieunio facinus suum defleuit, sicque Dei erga Ie[m] misericordiam prouocauit. Et factus est sermo Domini ad Heliām, dicens: Nónne vidisti humiliatum Achab coram me? quia igitur humiliatus est mei causa, non inducam malum in diebus eius. Manasses scelerum impietate omnem memoriam superauit, diuinæ legis obseruantiam & cultum euertit: & tamen post cruenta flagitia in regnum suum est reductus, & inter Dei amicos numeratus.

Nabuchodonosor hominum superbissimus, nullumque agnoscens Dominum, honorem sibi arrogabat diuinum. Deus autem volens eum saluum fieri, dementatum & septem annis inter feras herbarum radicibus pastum, ad sui

Dan. 4.

eum reduxit cognitionem, eumque peracta pœnitentia in pristinam restituit regni dignitatem: restitutus Deum laudauit: & glorificauit, eius expertus misericordiam.

Filius prodigus.
Lucæ 15.

Et ut veteris testamenti innumera exempla prætermittamus: Filius prodigus, qui cum meretricibus consumperat vniuersam suam substantiam, ad patrem suum reuersus per pœnitentiam: non modò paternum osculum, sed

etiam

etiam vituli saginati promeruit epulum, recipitque prioris gloriæ statum. Zachæus publicanis & raptoribus publicanus ipse & raptor præfuit, & tamen si quid alicui abstrulit, quadruplum reddidit, & ad ipsius hospitium Dei filius diuertit. Matthæus ex Matthæus, publicano Apostolus & Euangelista est effectus. Maria Magdalena illicitum in se a morem carnis, igne diuini excoxit amoris: tantumque gratiæ locum apud Dominum invenit, ut ipsis quoque apostolis nuntia resurrectionis extiterit. Columna ecclesiæ, funda- mentum fidei, primus Apostolorum Petrus lapsus erat in fide: sed egressus foras, fleuit amare, & trinæ negationis veniam consecutus, Pastor Ecclesiæ est confirmatus: & qui timidus negauerat Christum, postea factus est Princeps Christianorum: fideliorque factus est, postquam fidem se perdidisse desleuit, atque ideo maiorem gratiam reperit, quam amisit. Sed cur omnipotens Deus eum (quem universæ Ecclesiæ suæ præficere disposuerat) ancillæ vocem pertimescere, & se ipsum negare permittebat? id nimirum magnæ actum est pietatis dispensatione, ut is qui futurus erat pastor Ecclesiæ in sua culpa disceret, qualiter aliorum misereri deberet: prius eum sibi ostendit, & postea eum cæteris præposuit. Paulus ex persecutore fidelium, Doctor & Apostolus factus est gentium. Sed multò maximam veniæ præstat fiduciam latro ille, qui vel suo ipsius iudicio reus erat mortis supplicio: cuius culpa certa erat, ideoque damnationem

Zachæus.
Lucæ 19.

Matth. 28.

Cur Deus
permisit
Annullæ vo-
cem Petrum
timere.

Paulus.

Dysmas lac-

tro.

Luke 23.

temporalem & æternam meruerat: qui iam temporali morti erat suspensus, & æternæ morti propinquissimus, & tamen in ipso crucis patibulo Christum agnoscens solum dixit: Domine, memento mei, cum veneris in regnum tuum. Et mox audire meruit ore dominico: Hodie tecum eris in Paradiſo. Latroni regnum, crucifixo cælum, & damnato Paradiſum, eadem die promisit possidendum: vbetior fuit gratia Dei promittentis, quam precatio latronis supplicantis: plus ille promisit, quam hic petiuit: conuersus pœnituit, & a Deo remissionem obtinuit. Ille, qui talis ad crucem venit ex culpa, ecce, qualis a cruci recedit ex gratia? de latibulis suis ascendit in patibulum, & de patibulo in paradiſum: de ipsa pœna criminis peruenit ad præmia virtutis.

**Infinita
exempla
diuinæ mi-
sericordiæ
exstant pas-
sim in sacra
Scriptura.**

**Electi cur a
Domino
permittan-
tur peccare.**

Sed cur tot exempla, cur tot diuinæ misericordiæ produco testimonia? nulla est sacra Scripturæ pagina, in qua non reluceat Domini misericordia, cuius etiam plena est tota terra. Qui multos ab iniquitatibus suis sanatos audis, quid aliud quam supernæ misericordiæ pignus accipis? Idcirco omnipotens Dominus electos suos in quibusdam lapsibus permisit corruecere, ut sicut illi resurrexerunt, ita & qui in similibus corruerunt, sperent pariter resurgere, & quos secuti sunt peccantes, sequantur etiam pœnitentes. Quid in omnibus his debes aspicere, nisi immensam Conditoris nostri misericordiam, qui tibi ad pœnitentiæ & conuersonis exemplum eos obiicit, quos post lapsum per pœnitentiam vivere fecit?

Quod

Quòd me non audis, & peccatorem saluari posse adhuc non credis, magis audi Deum, quàm meipsum: magis eī crede quàm mihi: veritas est, falli nequit, & fallere non potest. Nolo (inquit) mortem peccatoris, sed ut magis Ezech. 18. conuertatur & viuat. Deus non vult mortem peccatoris, qui mori voluit pro eius peccatis: vult, ut mors sua sit fructuosa, & per eam redemptio copiosa. Imò & ipsum nomen IE-
Nomen
SV, id est, Saluatoris, quid aliud pollicetur
peccatori, quàm salutem & misericordiam? Iesu.

venit in mundum peccatores saluos facere. &
ab ea, qua tenebantur damnatione, liberare.
Non est opus sanis Medicus, sed malè haben-
tibus: & ideo non venit vocare iustos, sed pec-
catores: missus est ad oves, quæ perierant, do-
mūs Israël. Non est voluntas Pastoris, ut una
pereat de ouibus sui gregis. Qui habens cen-
tum oves, si ex illis perdidet unam, dimitit
nonaginta nouem in deserto, & vadit ad illam,
quæ perierat, donec inueniat eam. Sic non est
voluntas Patris nostri & Creatoris, ut unus pere-
at de filiis suis & creaturis: quòd si perit, suâ,
non Dei voluntate perit; Dei etenim miseri-
cordia in communi posita est, datürque omni
petenti, & sese offert omni querenti; nemo il-
lius est exp̄s, nisi qui eam à Deo postulare
neglexerit. Perlege totam Christi vitam, &
nullum inuenies, qui clamauerit, Iesu, fili Da-
uid, miserere mei, quin mox consecutus sit mi-
sericordiam. Sanauit ægrotos, pauit fameli-
cos, subleuauit periclitantes, restituit mancos
& debiles, mundauit leprosos, illuminauit

Non est
opus sanis
Medicus.
Matth. 9.
Matth. 15.


Luca 15.

Nemo un-
quam ex-
pers fuit di-
uinæ mile-
ricordie,
qui eam pe-
tit.

Nota.

cæcos, mortuos suscitauit, & pœnitentes absoluit.

Itaque, frater charissime, caue post hac mihi dicas: superbus sum, auarus, luxuriosus, & omni peccato obnoxius, ideoque saluari non possum. Nolo mihi hanc tuam ignauiam prætendas, nolo mihi villas excusationes afferas: habes exempla omnium, potes ad quem volueris confugere portum. Si in fide lapsus es, aspice Petrum: si contra proximum in malitia crudelitatis exaristi, perpende latronem: si aliena diripiisti, intuere Zachæum: si carnis munditiam perdidisti, considera Magdalenam, & sic de aliis. Qui in eadem sicut & tu peccata corruerunt, sed sicut & tu eorum veniam non desperârunt: unde cum fiducia adeuntes diuinæ misericordiæ thronum, plus gratiæ & misericordiæ inuenerunt, magisque pium & misericordem senserunt, quam credebant. Tu itidem eorum exemplo ne desperes, ne animo concidas, sed per pœnitentiam ad Deum te conuertas, si eum peccatorum tuorum veniam orabis, eam sicut & illi exorabis. Eam solùm pete, & accipies, quare eam, & inuenies: non nouit Dominus differre, quem contrito corde sibi senserit supplicare.



QVOD

QVOD CONVERSO DOMI-
NVS NON NEGAT VENIAM, QVI
ETIAM AVERSVM INVITAT AD
CONVERSIONEM.

CAP. IV.

AT dixeris, Considero quanta inter Deum & me est differentia, & quod ab eius oculis propter mea excludor demerita. Et idcirco desperans impetrare, existimansque me indignum ad eum venire, non audeo oculos ad eum eleuare. R. Deus, frater charissime, cuius natura bonitas, cui familiaris suauitas: totus clemens est & pius, magisque ad misericordiam quam ad vindictam pronus: diues est in misericordia, & munificus in gratia. Ei proprium est misereri semper & parcere, ideoque contrito corde misericordiam petenti, non potest denegare: nullum pœnitentem despicit, nisi qui petere dubitauit: Nullus in eo sperauit & confusus est, nullus in tempore opportuno veniam petiuit, & repulsam passus est. Si Deus peccatores non audiret, frustra publicanus dixisset, Deus, propitius esto mihi peccatori, nec ex ista oratione meruisset iustificari. Ne punire peccatores debeat, rogari vult ipse qui iudicat: vult veniam precibus a se exigi, qui quantum meremur, non vult irasci: vult placari precibus, qui scit, quod portari non potest iratus. Ipse sibi testis est, quia inuocantibus misereri desiderat, qui ad se inuocandum nos prouocat. Inuoca me (inquit) in die tribulationis tuæ, & eripiam te & magnificabis

Deus totus misericors.

Deus multo plus ad misericordiam quam ad vindictam pronus.

Peccatores Deus exaudit.

Lucæ 18.

Rogari vult Domine nus.

Psalm. 49.

O 5 me.

Matth. 7.

Simile.

Homo ad
Dei ima-
ginem crea-
tus.Christus mi-
tis homini-
bus.Deus plus
desiderat
veniam dare
quam nos
accipere.

me. Et alibi Petite, & dabitur vobis; quærite & inuenietis; pulsate, & aperietur vobis. Si patres carnales, etiam mali cum sint, nouerunt bona dare filiis suis; quanto magis pater noster cœlestis, qui bonus est, bona dabit potentibus se filiis? Si ad Deum accedere propter peccata tua diffidas, propter patris erga filium bonitatem confidas. Confide apud eum, cuius te insignem cernis imagine, & illustrem similitudine: quid veteris de maiestate, cui fiducia datur origine? Otiosa non est apud Deum animæ generosa cognatio, & cognitionis testis similitudo: similis similem libenter in societatem admittit, & de ratione naturæ similis similem sibi quærit.

Mediator Dei & hominum Iesus Christus, homo pro hominibus factus, mitem se præbet hominibus. Ne qua tibi desperandi cauſa superesset, utque tibi homini apud Deum fiduciam præberet: Deus homo factus est, & aduocatus tuus factus est iudex tuus. Non dengabit se petenti, qui vltro sese obtulit non petenti: & quærens eum, inueniet, qui non quærenti dedit, ut inueniret: & pulsanti aperiet, qui stat ad ostium & pulsat incessanter. Eum exhilarat peccatorum conuersio, & veniam desperas tibi conuerso? Plus desiderat veniam dare, quam tu accipere; plus peccata tua remittere, quam tu ea dimittere, & de iis penitentiam agere. Te magis vult sua pietate saluare, quam tu tuo peccato perire. Tu mori voluisti peccando, ipse vero mortem tuam non vult, te ad penitentiam expectando.

Stat

Stat cum magna charitate ad tuæ mentis o- Proverb. 23.
stium, clamans : Fili, præbe mihi cor tuum,
Ipse de se profitetur, Si quis mihi aperuerit, Apocal. 3.
intrabo ad eum.

Si pauper aliquis multùm offendisset Re- Simile.
gem, & Rex prior vocaret eum ad pacem: ma- Rex paupe-
ximum esset regiæ benignitatis argumentum, & rem prior
cùm maiori fiducia pauper veniret ad eum. vocans ad
Et tu ad Deum conuerti pertimescis, qui etiam pacem.
rogat, vt ad se conuertaris? & qui non solùm Deus auer-
à conuersis non auertitur, sed etiam ad auer- los reuocat.
sos conuertitur, & ad conuersionem cohorta-
tur? Et quare moriemini, (inquit) domus Isra- Ezech. 18.
ël? reuertimini & venite. Et alibi: Si dimi- Hierem. 3.
serit vix vxorem suam, & illa recedens dux-
rit virum alium, nunquid reuertetur ad eum
vltrâ? nunquid non polluta & contaminata
erit mulier illa? Tu autem fornicata es cum Mulier for-
amatoribus tuis multis, tamen reuertere ad me, nicaria.
dicit Dominus. Mulieris repudiata, & for-
nicantis similitudinem adducit, ostendens, quòd
post fornicationem & turpitudinem suam re-
cipi non possit: sed ipsum exemplum quod
protulit, vicit: dicens recipi non posse forni-
cantem mulierem, & tamen se recipere velle
fornicantem animam. Ecce, peccatricem ani- Animia for-
mam reuocat, etiam quam inquinatam denun- nicanter recipiatur à Deo.
tiat: ad eam recipiendam supernæ pietatis sinus
aperitur, nec maculosa eius vita contemnitur.

Quæ lingua diuinæ pietatis viscera nar- Deus despe-
tate sufficit? quæ mens tantæ misericordiæ di- & cus adhuc
uitias non obstupescat? Despicitur, & expe- reuocat,
ctat: contemni se videt, & reuocare non ces- sat.

sat. Ultionis sententiam diu suspendit à contemnente, ut quandoque exhibeat gratiam remissionis in pœnitente. Dominus venire differt; iam venisset, si vellet: & tamen ad veniendum tardat, ne inueniat, quod in te puniat. Si voluisset tuam damnationem, dum peccasti, in infernum detrusisset tuam animam: misericordia Dei est, quod consumptus non es. Quod enim Deum non metuis, & tamen viuas: quod peccare non desnis, & tamen proficias: quid aliud est, nisi quod misericors Dominus quem expectando vult corriger, aspiciendo non vult corripere? propterea expectat Dominus, ut misereatur tui. Cuius ut & bonitas tuam vincat malitiam, & patientia cordis tui emolliat obstinationem: instar bonæ matris te ad se allicit blandiendo, quem reuocare non potest comminando: dum sua abs te beneficia non subtrahit, solem suum super te, sicut & super alios, oriri facit, & tibi sicut & aliis necessaria suggerit. O veneranda Dei pietas! peccamus, & parcit: delinquimus, & ignoscit: cum in multis offendimus, nec tamen sua à nobis beneficia subtrahit. Unde qualis erga iustos sit, demonstrat, cum se erga peccatores talem exhibeat.

In Euangelio etiam lachrymis prosequitur Hierosolymam, quæ pertinacia peccandi sibi accersebat damnationem. Quoties (inquit) volui congregare filios tuos, quemadmodum gallina congregat pullos suos sub alas, & noluisti? Plorat clementissimus Dominus, quod perditissimos sibi saluare non liceat, &

Misericordia diuinæ
est, quod
homo pec-
cans statim
non da-
mnetur,
& consumma-
tur, & per-
eat.

Matth. 23.

Notandum
pro diffi-
dente.

tu diffidis, quod tibi conuerso misericordiam exhibeat? Duo in eo sunt ingenitæ mansuetudinis argumenta, scilicet in expectando longanimitas, & in condonando facilitas: quia & patienter expectat delinquentes, clementer recipit pœnitentes: peccata hominum & per patientiam tolerat, & per eorum pœnitentiam relaxat: ut vel serò redeant, & hoc ipsum, quod expectati sunt, erubescant. Quandocunque conuertuntur, mala obliuiscitur præterita, & bona promittit futura. O maxima Dei patientia, qua parcit contemptus, parcit etiam negatus. Te peccare vidit, & pertulit: priùs peccare prohibuerat, & tamen post peccatum ad veniam te expectat.

Misericordia Dei duplex.

Si famulus tuus loquenti tibi superbiret, faciem in terga mitteret: contemptus superbiam eius ferires, & vulnera districtæ animadversionis infligeres. Sed tu à Deo auersus es, & ad te conuertitur: eum fugis, & te post tergum sequitur: videt, quod despicitur per suam pœnitentiam, & tamen te adhuc expectat ad pœnitentiam. Cum omni exhortatione, beneficiorum collatione, interna inspiratione: in proprio bono & propria utilitate Dei voluntatem non vis facere: & quo modo is exaudiens te in die necessitatis pro te supplicantem, cum tu pro teipso eum non audias te rogan tem. Quoties enim dixit tibi Dominus, Conuertere ad me, & ad eum non es conuersus? Si tui misereri nollet, eum rogares, ut vellet: nuncautem tui vult misereri, & non vis: te ad pœnitentiam inuitat, & id negligis? Si non for-

Similitudo.
Famulus
dominum
suum con-
temnens.


Ad conte-
mnen tem
Dei adhor-
tationem
oratio.

formidas iustitiam Dei vindicantis, saltem eius
 erubescere bonitatem te ad se vocantis: & pœ-
 nam peccatis tuis debitam qui experiri pote-
 ras percussus, saltem erubescere expectatus. Ne
Deus con-
temptus, fe-
rit grauius, quem nunc tranquillum despicias, iratum post-
Nota. ea videre non possis: tanto enim grauiori
 malitia contemnitur, quanto etiam contem-
 ptus reuocare non deditur. Dum colla-
 ta vita remedia ad culpæ augmentum trahi
 conspicit: ipsam quam contulit benignitatem,
 in iudicii conuertit distinctionem, ut inde am-
 plius feriat, vnde modo amplius expectat.

Orationis
importuni-
tas.

Importuni-
tas hæc est
commendata.
accepta.

Itaque, frater charissime, dum misericors
 Dominus te sustinet, dum ad ultionem ma-
 num erigere differt: eum postula indulgen-
 tiam, qui eius contempsisti legem: liceat ve-
 niām petere, cui culpam non licuit contrahere.
 Petre veniam precibus, quare eam vigiliis & la-
 boribus: fac, quod potes, ut amplius possis, &
 perseuerando accipies, quod petis. Ea mi-
 sericordi Domino importunitas placet, quæ ho-
 bilis, ac Deo minibus odiosa esse solet. Peccatorum ve-
 nia, precum exoretur instantia, ut Dominum,
 quem peccata tibi fecerunt iracundum, red-
 dant obsequia digna placatum: & qui à te fu-
 erat peccatis offensus, per pœnitentiam
 tibi misericors reddatur
 & pius.



QVOD

QVOD MVTATO PECCATORE
DEVS MVTAT SENTENTIAM,
QVIA EIVS VITAM MAVVLT
QVAM MORTEM.

CAP. V.

AT dixeris, non est Deus quasi homo, ut Num. 23.
mentiatur, nec quasi filius hominis, ut
mutetur: ipse dixit Ezechielis decimo
octavo, Anima quæ peccauerit, ipsa morietur.
Hæc Dei sententia immutabilis est, quia Deus
mutari non potest. R. Verum quidem est, fra-
ter charissime, quod anima quæ peccauerit, Pœnitentia
ipsa morietur; quia per peccatum æternam viuiscat.
damnationem meretur: sed huic animæ mor-
tuæ pœnitentia medetur: pœnitentia reddit,
quod peccatum detraxit: per hanc reparatur
vita gratiæ, in qua anima decedens euolat ad
vitam gloriæ: nec ei plus nocent peccata præ-
terita, quam homini sano sanati morbi & vul-
nera. Quamvis hæc anima peccauerit, tamen
non morietur, quia pœnitendo peccatum suum
delevit, per quod æternæ morti obligabatur.
Cessante causa cessat & effectus, nouit Deus
mutare sententiam, si tu noueris mutare tuam
vitam. Si mihi non credis, Domino crede;
Impietas impii (inquit) non nocebit ei, in qua- Ezech. 33.
cunque die conuersus fuerit ab impietate sua.
Item alio loco, Si pœnitentiam egerit gens il- Hierem. 18.
la à malo suo, quod locutus sum aduersus eam,
agam & ego pœnitentiam super malo, quod
cogitaueram, vt facerem ei. Deus qui im- Pœnitentia
mutabilis & impassibilis est, nulla mutatione Dei,
aut

aut passione affici potest: tamen mutari & pœnitere dicitur non secundum rei veritatem, sed secundum hominis modum & similitudinem. Sicut enim homo mutari & pœnitere dicitur, dum consilium mutat, & malum facere non vult, quod proposuerat: ita & Deus mutari & pœnitere dicitur, dum malum non infert, quod minabatur. In quo consilium non mutat; ea enim, quæ ab æterno præordinauit, immutabiliter eueniunt, sed rem ex se mutabilem prout voluerit, mutat, secundum quod hominum merita aut demerita requirunt: quod non arguit mutationem in Deo, sed tantum in libero hominis arbitrio.

Ezechias.
4. Reg. 20.

Isaiæ pro-
phetæ ser-
mo ad Eze-
chiam.

Niniuita-
rum pœni-
tentia.
Ione 3.

Aegrotauit Ezechias usque ad mortem, & venit ad eum Esaias, & dixit ei, Hæc dicit Dominus Deus, dispone domui tuæ, quia morieris tu, & non viues: conuertensque Ezechias faciem suam ad parietem, orauit Dominum, & fleuit fletu magno. Et antequam egredetur Isaias medium partem atrii, factum est verbum Domini ad eum dicens, Reuertere, & dic Ezechia: hæc dicit Dominus Deus Dauid patris tui, Audiui orationem tuam, & vidi lacrymam tuam: & ecce, sanavi te, die tertio ascenes templum Domini, & addam diebus tuis quindecim annos. Niniuitæ audiebant Ionam prophetam ex diffinito comminantem, Adhuc quadraginta dies, & Niniue subuertetur. Sed ne sic quidem viri Niniuitæ animis considerunt: quinimo quamuis non satis considerent posse exorari Dominum, tamen ad pœnitentiam quasi ad salutis portum confugunt.

tunt. Credideruntque in Domino & indixerunt ieunium, & vestiti sunt fassis à maiore usque ad minorem dicentes: Quis scit, si convertatur & ignoscat Deus, & reuectatur à furore iræ suæ, & non peribimus? Et vedit Deus opera eorum, quia conuersi sunt de via sua mala, & misertus est super malitiam, quam locutus fuerat, ut faceret eis, & non fecit. Ezechias de morte sua iam latam sententiam reuocari lachrymis impetravit. Niniuitarum pœnitentia iam promulgatam de suæ ciuitatis extermilio sententiam reuocari promeruit: tamen nec Prophetæ fallaces extiterunt, qui quo tempore ii pro peccatis suis mori merebantur, prædixerunt: sed diuinæ misericordiæ largitas eos illo tempore ad mortem distulit, quod ante sæcula præordinauit.

Quod si imperiti illi & barbari non desperarunt, & iam lata contra se mortis sententia animis non conciderunt, quid desperas miseri? quid animo concidis? Deum spalias misericordia, sine qua Reges non sunt Reges, sed tyranni. Sententia illa, Anima, quæ peccauerit, ipsa morietur, de anima, quæ de peccato suo non egerit pœnitentiam, intelligitur, sicut & dicitur in humanis iudiciis, quod si quis hæc vel illa fecerit, multabitur pena mortis; tamen semper intelligitur: nisi reus regiabet dignitate absoluatur. Non sic est de diuina Iusticie diuinæ ad humnam comparatio, instituta, sicut de humana. In hac quod magis crimen suum reus confiteritur, eo plus pœnae ipsi interrogatur: in illa vero quanto magis peccator se accusauerit, tanto maiorem erga se Dei

Pœnitentia
yis.

misericordiam sentit: sicut repellit Deus peccata sua defendantem, ita recipit confitentem. Si pœnitentiæ scires efficaciam, peccatorum non desperares veniam: libenter obliuiscitur misericors Dominus, quod nocentes suimus. & pœnitentiam nostram nobis ad innocentiam deputare est paratus. Si de peccatis nostris pœnitentiam egimus, iam districtæ illius sententiæ rigorem euasimus; Deus superiorem vitam nostram nobis non imputat, modò eius nos pœniteat: videns mutata opera, libenter mutat sententiam, quia vitam mauult peccatoris quam mortem: nec lætatur in perditione animarum, sed voluntas eius est sanctificatio nostra. Stantibus, si ceciderint, minatur pœnam, quam pertinaces non corruant: lapsis verò promittit misericordiam, de qua confidentes resurgant. Illos terret, ne prælumant in bonis, hos refouet, ne desperent in malis.

Maternus
amor ad fi-
lium.

Isaiae 49.

Sicut enim mater beneuola dilecto filio minatur verbera: qui si culpam suam agnoscens matris misericordiam implorauerit, eam materna pietas facile condonabit: sic etiam misericors & miserator Dominus patiens & multæ misericordiæ, et si peccatis nostris iuste irascitur, tamen veniam rogatus multa facilitate placatur. Nunquid obliuisci potest mater infantem suum (dicit Dominus) ut non misereatur filio vteri sui? & si illa oblita fuerit, ego tamen non obliuiscar tui. Beneuola mater ægrotantis filioli summopere desiderat sanitatem, sed multò plus peccatricis animæ Deus desiderat.

desiderat salutem. Quamuis infinitæ Dei bonitati nulla humana bonitas possit conferri: ^{Dei erga nos charitas,} tamen quia summæ affectionis nullum inueniri potest maius exemplum, quam matris erga filiolum suum: ideo erga peccatorem charitas Dei maternæ comparatur affectioni. Nemo amatorum carnalium ita exardescit in amorem sponsæ suæ, sicut Deus in amorem animæ tuæ.

Maiorem charitatem nemo habet, quam ^{Christus} vt animam suam ponat pro amicis suis. Christus autem etiam si fuisses solus, pro te fuisset ^{passus pro peccatori- bus.} passus & mortuus, antequam animam tuam dimisisset in diaboli faucibus. Pro quibus enim mortuus est, nunquid pro iustis? Paulum interroga, Christus (inquit) pro impiis mortuus est. Si nullum fuisset in mundo peccatum, Christus non effudisset sanguinem suum. Quid enim necesse erat, vt Deus sanguinem suum effunderet, nisi vt tua & totius mundi peccata redimeret? Minima gutta pretiosi illius sanguinis, abundè sufficiebat pro redemptione totius humani generis: tamen vt summam suam erga nos exprimeret charitatem, totum suum pro nobis effudit sanguinem: multa dixit, multa fecit, multa passus est, dum nos redimeret: tamen si quos solo verbo creuerat, solo verbo reparare posset. Accepit mortem nostram, vt nobis daret vitam suam: vitam attulit nobis, mortem verò accepit à nobis, nec tamen pro suo merito, sed pro nobis. Venit ad regionem peregrinationis nostræ accipere, quod hinc abundat: opprobria, flagella, colaphos, sputa

*Nota.
Christus cur totum suum sanguinem effudit,*

Speranda
beatitudo.

Ioan. 12.

Rom. 5.

Angelorum
gaudium
super pœni-
tencie.

in faciem, contumelias, spineam coronam, crucem & mortem: hæc abundant in regione nostra, ad talia venit commercia. Quid hic dedit pro iis, quæ hic accepit? dedit exhortationem, dedit doctrinam, dedit peccatorum remissionem. Attulit nobis de illa regione multa bona, & in nostra regione pertulit multa mala. Tanta præcessit dilectio, ut nobiscum esset, ubi eramus: ubi etiam ipse est, cum ipso erimus. Vbi ego sum (inquit ipse) illic & minister meus erit. Quid tibi Deus promittit, ô homo? quia certè in æternum victurus es cum eo, & id non credis? Crede, crede; plus est iam, quod fecit, quam quod promisit: incredibilius est, quod mortuus sit æternus, quam quod mortalis homo in æternum sit victurus. Victorius es cum eo in æternum, propter quem mortuus est, qui viuit in æternum: securus esto te accepturum vitam ipsius, qui pignus habes mortem ipsius. Vnde Paulus, Si cùm inimici essemus, reconciliari sumus Deo per mortem Filii eius: multò magis reconciliati salui erimus in vita ipsius. Grauius est pro peccato mori, quam peccatum tollere, & iam cooperantem saluare. Ad mansionum cœlestium reparationem, non ad æternam damnationē te & creauit & redemit Dominus: quod si damnationem tuam voluisset, quando peccasti, te in infernum detrusisset.

Hinc colligere potes eum magis gaudens de tua reparatione, quam de tua damnatione, quod ipsi & Angelis eius maius est gaudium super uno peccatore pœnitentiam agente, quam super nonaginta nouem iustis, qui non indigent

gent pœnitentiâ. Quod ipsemet Dominus tripli exempli exēmplo comprobavit: scilicet ouis perditæ, quam inuentam pastor gaudens ad ouile super humeros reportauit: & drachmæ perditæ, qua inuenta mulier vicinas suas ad congratulationem conuocauit: & filii prodigi, cui ad patrem redeundi vitulus saginatus occisus est: quod fratri qui semper cum patre remanserat, factum non est. Quanto magis contristat res perdita, tanto magis lœtificat, si fuerit inuenta: unde & de peccatore conuerso, quam de stante iusto, maius gaudium est in cœlo: Deo etenim gratiōr est amore ardens pœnitentia post culpam, quam securitate torpescens innocentia per gratiam. Sicuti & dux in prælio plus eum similitudo militem diligit, qui post fugam reuersus fortiter hostem premit, quam illum, qui nunquam transfugit, & nunquam aliquid fortiter gessit.

Agricola etiam plus amat illam terram, quæ post spinas vberem profert messem, quam illam, quæ nunquam spinas habuit, & nunquam fertilem messem protulit. Si Deo & Angelis eius hinc tanto sunt gaudio tuæ lachrymæ, quanto, putas, gaudio eis illic futuræ sint tuæ deliciæ? hos cibos epulantur, iisque fructibus delectantur: si peccatum tuum mortifices per contritionem, oblitteres per confessionem, sepelias abolefasque per satisfactionem.

Itaque, frater charissime, etiam si te condemnatum putares per Dei iustitiam, ad eius appellā misericordiam: sit enim interdum, ut quem iustitia accusat, misericordia absoluat: & posnam, quam Dominus iuste exigere posset,

Tripli exempli
Dominus comprobat se gaudere Super pœnitentibus: Ovis. Drachmæ. Filii prodigi.

Similitudo optima. Transfuge strenuus.

Nota.
Desperandum nunquam est.

Nota sen-
tentiam.

misericorditer condonet. Quamdiu viuis, liberi est arbitrii tui pœnitere, & sic ad vitam resurgere gloriosam: aut in peccatis tuis permanere, & sic in æternam corrue(re) damnationem. Sed quia Deus, quos gratis & creavit, & redemit, eos libenter non opprimit: ideo si te pœniteat tuæ culpæ, eum quoque suæ pœnitentia sententia: immutabilis Dominus suam mutabit sententiam, si tu mutaueris tuam vitam. Sic vinces inuincibilem, ligabis omnipotentem, & tremendum iudicem conuertes in piissimum patrem.

QVOD ETIAM IN ARTICVL
MORTIS POENITENTIA ESSE
POTEST SALVTARIS.

CAP. VI.

AT dixeris, Tardè veni, totam vitam meam in peccatis consumpsi: morti proximus sum, in nouissimo die pœnitere non possum: nec Deo pro peccatis meis satisfacere, & condignam pœnitentiam agere. R. Iuuenis homo es, & bonæ valetudinis, frater charissime, multos adhuc annos viuere potes, & in iis Deo acceptam pœnitentiam agere. Tamen quia nemo est quantumlibet iuuenis, qui vsque ad vesperum, certo sibi polliceri audeat se victurum: potestque subitus mortis casus qualibet diei hora te opprimere: quo tempore desperans hæc mihi posses obiecere: idcirco huic obiectioni satisfaciendum duxi, tametsi eam mihi nunquam obiecessi.

Dum

Dum viuis, dum adhuc spiras, frater charissime: etiam in ipso lecto positus, & in articulo mortis constitutus pœnitere potes, & maximè potes: adhuc spes est misericordia, tempus venia, & locus pœnitentia. Ipse met Deus de se testatur: quòd quacunque hora in gemueris, omnium iniquitatum tuarum non recordabitur. Qui quacunque hora dixit, etiam mortis hora non exclusit: qui omnium iniquitatum se non recordaturum promisit, nullum peccati genus exceperit. Etsi per temporis breuitatem non vacat confiteri, tamen in momento & noctu oculi de omnibus peccatis vacat conteri: uno solo impetu contritio illa momentanea omnia præteritæ vitæ exterminat peccata, quantumcunque grauia & multa defruuntur: ob syncerum confitendi affectum, Deus remittit peccatum: voluntas reputatur pro opere, & confessio tunc auditur in corde. Si igitur in mortis articulo per pœnitentiam desineres esse malus, ideo desperare non deberes, quia in ultimo vitæ termino es possitus. Deus etenim, qui vniuersorum finem considerat, vnumquemque de suo fine, non de vita præterita iudicat: nec tam respicit, quales ante fuimus, quam circa finem, vitæ, quales sumus. Nihil refert quamdiu, sed quam bene quis vixerit: nec criminis quantitas aut vitæ enormitas, nec temporis breuitas, aut horæ extremitas excludit à venia, si sincera & integra sit in fine pœnitentia. In qualibet breui hora potes peccatorum tuorum veniam, & multorum meritorum gratiam, & San-

Notæ de pœnitente tardè.
Pœnitentia semper salutaris.

Ezech. 33.
Quacunque hora pœnitere quid sit.

Contritionis efficacia.

Exitus acta probat.
Pœnitentia momentanea.

ctorum obtinere gloriam. Non enim numerositas honorum operum, nec diuturnitas temporum, sed maior meliorque voluntas auget meritum; magna & multa Dei misericordia

*Magna Dei
misericor-
dia, tempo-
ris non co-
arctatur an-
gusta.*

Notandum.

temporis non coarctatur angustia. Qui veram pœnitentiam egerit, & à peccati vinculo, quo astricatus erat, solutus fuerit; & bene post pœnitentiam vixerit, sicut ante pœnitentiam viue-

re debuit; quandocunque fuerit defunctus, ad Deum vadit securus: regno Dei non priuabitur, à populo Dei non separabitur. Sicut enim denarius diurnus redditur & iis, qui à primo manè in

vinea Domini laborantes pondus diei & æstus portauerunt, & iis etiam, qui circa undecimam, seu ultimam diei horam in eandem Domini vineam venerunt: ita & non solum ab adolescentia sua iugum Domini portantibus, æterna merces promittitur: sed etiam nouissimis in fine dierum suorum pœnitentibus vitæ æternæ denarius tribuitur.

Niniuitæ: Innumeræ Niniuitarum culpas breuis pœ-

Publicanus. nitentia detergit, & Publicanus repente de tem-

Magdalena. plo iustificatus exiuit. Maria Magdalena tam

peccatrix erat, & plena sceleribus, ut eam dignaretur videre Pharisæus: tamen paruo temporis spatio est iustificata, & ab omnis pec-

*Dysmas la-
tio.* cati inquinamento purgata. Latro in cruce

pendebat, & iam iam moritus, salutem suam etiam renitente socio non desperabat: Dominum confessus in cruce, penè cum ipsa confessionis voce spiritum exhalauit vitæ: & tamen ad paradisi gaudia priùs eum Dominus perduxit quam Petrum: & ne quis aliquando

seram

seram pœnitentiam putaret, fecit homicidii pœnam martyrium. Sera quidem fuit eius pœnitentia, sed sera non fuit indulgentia; citò ad Deum conuersus est, citò etiam ei ignotum est, hi ostendunt tibi fructum pœnitentiae, fontem misericordiae, & celeritatem indulgentiae, tardiùs enim pœnitere & benefacere cœperunt, & tamen feruentius agendo primi facti sunt: & eos meritis præcelluerunt, qui citius inchoantes negligenter egerunt. Possibile etiam tibi est, sicut & iis, primos pertransire, & in regno cælorum præcedere.

Etiamsi in ultima ætate adhibeas pœnitentiam, potes de peccatis tuis promereri indulgentiam: quamlibet breuis & momentanea fuerit conuersio, infructuosa & inutilis non erit tibi conuerso. Sed sicut is qui calicem Matth. 10, aquæ frigidæ porrexit, nequaquam mercedis fructum amisit: ita & licet minus digna videatur ad peccatorum pondus pœnitentia, tamen quantulus cunque ille nutus pœnitendi, conuersionisque momentum, expers non erit remunerationis bonorum. Temporis quamlibet brevis Deus suscipiet pœnitentiam, nec patietur quamlibet brevis conuersionis perire mercedem.

Nemo potest Deo satisfacere, quantum eius altitudo depositit, & secundum peccata, quæ in eum commisit. Maiori luctu digna sunt peccata mortalia, etiam quum à dignè pœnitentibus lugeantur: infinita enim Dei offensa, infinitam reconciliationem meretur. Tamen quia finita humani ingenii capacitas infiniti non est capax: ideo nostris succubentibus meritis, non sufficiente nostra iustitia,

P f

Chri-

Pœnitentia
etiam in
morte fru-
tuosa.

Satisfactio
condigna
homini im-
possibilis.

Christus pro
nobis satis-
fecit.
Christi pas-
sio, non suf-

ficiente no-
stra iustitia
nostris suc-
cumbenti-
bus meritis
succurrit.

I. Ioan. 2.

Medicus
dans dono
medicinas.
Simile o-
pus à Medi-
co benigno.

Deus dat,
vnde place-
tur.

Vir non pro
dignitate
honoratus,

Christi passio succurrit, ea omnium peccatis
abundè satisfecit. Deus pro peccatis nostris
nullum aliud exposcit pretium, nisi viageniti
sui sanguinem pretiosum: nihil est tam ad mor-
tem, quod non remittat per filii sui mortem.
Christus ipse est propitiatio, pro peccatis no-
stris, nec solùm pro nostris, sed totius mundi.
Veluti enim si pauperculus quispiam graui mor-
bo doleat, ad quem ingressus Medicus dicat:
plures species ad confectionem medicaminis
esse necessarias, ægrotus verò respondeat, se ob-
paupertatem non posse emere tantas, dicat au-
tem ad eum Medicus: illam & illam speciem
dare mihi potes, cætera autem de meo exhi-
bebo. Ita & misericors Dominus (qui animæ
tuæ summopere salutem desiderat) tantùm à
te exigit contritionem cordis, confessionem
oris, & satisfactionem operis: parum quidem
ad peccata tua, sed quod habes: quæ etiam
sine eius gratia, & te præueniente & tibi coo-
perante præstare non posses: cætera autem pro
sua misericordia condonat, & facile placatus
peccati culpam & pœnam relaxat. Donat, vnde
sibi sacrificetur, ipse tribuit, vnde placetur:
pro mira sua erga nos misericordia hoc tantum
requirit à nobis, & nos in amicos paratus est
recipere, si faciamus, quod est in nobis.

Velut est vir dignitatis eminentis, quem
si, vt dignus est, honorares, totam tuam sub-
stantiam in eo honorando expenderes, nec ta-
men eius dignitatem honore æquares: non ta-
men in eum peccas, quòd totum illud non fa-
cis; dum eum minus honoras, quam pro ra-
tione

tione dignitatis: imò verò absolutus es, si eum honoras, vt debes. Ita & Dominus Deus no- Deus non
ster, quia est infinitè bonus, infinita dilectio-
ne & reconciliatione est dignus: tamen no-
stram ex toto corde suscipit sui dilectionem, &
contriti cordis qualemcunque non respuit pœ-
nitentiam: quòd nisi infirmitatis nostræ ratio-
nem haberet, nunquam ei etiam de peccato
veniali satisfieri posset. Ipse autem (inquit
Psalmista) est misericors, & propitius fiet pec- Psalm. 77.
catis eorum: & non disperdet eos, & abunda-
uit, vt auerteret iram suam, & non accedit
omnem iram suam, & recordatus est, quia caro
sunt. Vbi autem misericordia fit, iudicium
non sœuit, vbi misericordia conceditur, pœna
condonatur.

Itaque, frater charissime, etiam si es constitutus in articulo mortis, tibi præscindere non deberes spem salutis: quamdiu in hac luce es superstes, de omnibus peccatis tuis verè pœnitere potes, tunc duntaxat, cùm ab hoc sæculo fueris abductus, ab irreuocabili sententia Dei fueris condemnatus, pœnitentia tuæ nimis seræ nullus inerit fructus. Valde te pœnitentebit in inferno, sed ibi pœnitentia medica-
menta tibi non proderunt, quia in
inferno nulla est re-
demptio.



QVOD

QVOD, QVAM DIV SVMVS IN
HAC VITA, SECVRI ESSE NON
DEBEMVS DE
VENIA.

CAP. VII.

AT dixeris, Quomodo fiet istud? Ulceribus plenus sum, & innumeris peccatis obnoxius; quo modo potero nosse aut securus esse, quod qualemque veniam habeo, & peccata mea mihi dimissa sunt a Deo? R. Ineffabilis est, frater charissime, Dei misericordia, quae etiam est super omnia eius opera: sine fine est, comprehendi non potest: superat omnem sensum, omnem animi cogitatum. Si potes mihi dicere, qualis est Deus, nosse etiam poteris, qualiter miseretur hominibus. Nam & ego interrogabo te, quo modo latro ille saluatus est, qui omnem vitam suam cruentam habuit homicidiis, persecutibus, & directionibus: ab hominibus pro suo scelere condemnatur, a Deo autem pro sua confessione coronatur, & paradiſi colonus efficitur? Interrogabo etiam te, quo modo homicidæ, adulteri, fures, cœterique carceris claustra habitantes, mille obruti accusationibus, & iam patatis carnificibus ad solum Regis nutum dimituntur? si hoc solo nutu facit homo moriturus, quanto magis Deus Angelorum Dominus? Dum liberari vis a corporali ægritudine, non interrogas rationem medicinæ: stat Medicus secans, & innumeras curationes adhibens, & non interrogas, quomodo curaris? seruo concedis, & Domino misericordiae non concedis?

Misericor-
dia Dei in-
comprehen-
sibilis.

dis? Noli interrogare miserendi modum, sed magis admirare & glorifica misericordem Dominum. Confide misericordi, & eius experientia misericordiam: qui diffidit Medico, sibi obstat, quod minus recipiat sanitatem.

Tenet fides Catholica & orthodoxa, quod Christus septem instituit sacramenta, quae in merito suae passionis, inuisibiliter peccatorum operantur remissionem; & sub signo visibili, gratiam conferunt inuisibilem. Quod sitanti mysterii experientiam habere vis, alioqui peccatorum remissionem non credis; iam firmiter credo, quod non es Christianus verus: quia qui in uno Symboli articulo delinquis, factus es omnium reus. Fides, est credere, quod non vides: quae autem videntur, fidem non habent, sed agnitionem, nec fides habet meritum, ubi humana ratio praebet experimentum. Per decimum illum Symboli articulum, nobis omnibus proponitur credendum, peccata quantumcumque grauia & multa, remitti per Ecclesiæ Sacraamenta, quae si dignè receperis, & quod in te est, feceris, haud dubie remissionem peccatorum consequeris. Nam te esse consequatum tunc demum credere potes, quando fecisti, quod in te est, quia facienti, quod in se est, Deus non denegat gratiam, sed ex ultore factus opitulator humanam adiuuat infirmitatem. Quod dimissa tibi sint peccata tua, alter scire nequimus, aliam securitatem tibi dare non possumus: quis enim scit, odio, an amo-te dignus sit? interim spei fiducia nos consolatur, ne hac anxietate penitus cruciemur.

VISNE

Remissio-
nem pecca-
torum cre-
dimus.

Fides quid?

Ecclesiæ

Visne, vt Deus iterum nascatur, aut de summo cælo egrediatur, vt eius ore audias sicut & Maria Magdalena, Dimituntur tibi peccata tua? Deum tentare videris, qui ab eo miracula requiris. Paulus Apostolus iam ad tertium cælum raptus fuerat, arcana verba, quæ non licet homini fari, illic audierat, & tamen trepidans adhuc dicebat, Castigo corpus meum, & in servitutem redigo, ne forte, cum aliis prædicauerim, ipse reprobus efficiar. Nondum erat securus, qui iam in tertium cælum fuerat raptus, & tu securus esse vis, qui adhuc in terra conuersaris?

Paulus
pauidus.

1. Cor. 9.

Dubitare
de venia
vtile.

Dubii de sa-
lute fortius
agunt pœni-
tentiam.
Proverb. 28.
Psalms, 2.

Psalms. 85.

Quoniam negligentia mater esse solet securitas, ideo semper trepidâ mente debes mentuere culpas, non debemus securi esse de gratia, & quod dimissa nobis sint peccata nostra.

Dubii enim de salute fortius agunt pœnitentiam, & Deum magis prouocant ad misericordiam. Vnde scriptum est, Beatus vir, qui semper est pauidus. Et rursus alio loco, Seruite Domino in timore, & exultate ei cum tremore. Solet etenim quibusdam contingere: vt dum se purgatos ab omni peccato putant, ab internæ mentis custodia animum resolvant: qui quidem ipsa sua elatione depresso eò deterius corrunt, quod magis de indulgentia blandientes vanæ spei securitatem sibi promittunt. Hinc orat Psalmista, Lætetur cor meum, vt timeat nomen tuum; non dicit, Lætetur, vt securum sit, sed, lætetur, vt timeat: ac si apertè diceret, ita me correctum facito gaudere de venia, vt tamen nunquam desinam esse suspectus de culpa.

Vides,

Vides, frater charissime, quod quam diu es in hac vita, pius pater non vult te securum esse de venia, non vult te scire, quantum proficias, ne inde superbiens in bono opere torpescas. Donec de hoc saeculo fueris egressus, semper suspectus esse debes & trepidus, ut ad celi gaudia securus transmigres, & per securitatis gaudium illic sine fine exultes.

DE GAVDIIS PARADISI.

CAP. VIII.

Sed quia spes (quae est desperationi contraria) est certa expectatio futuræ beatitudinis, proueniens ex Dei gratia & meritis nostris: & hac virtute cares, frater charissime, sine qua non potes saluus esse: ideo supereest, ut aliquam salutis spem tibi faciam, & ad illa celi gaudia animum tuum erigam: ut si ad Deum non conuerteris poenæ formidine, saltem id facias tanti premii expectatione.

Deus bonus & superbonus, sola sua honestate, non necessitate, beatitudinis suæ, qua æternaliter in se beatus est, alios voluit esse particeps: quam vidi & aliis posse communicari, & in nullo posse diminui. Creauit igitur in mundi primordio cælum illud decimum, immobile & claritatis perfectæ: dictum empyreum ab igneæ lucis fulgore & splendore, non ab ignis ardore aut calore. Quod eodem temporis momento ut est creatum, nouem angelorum ordinibus est repletum: non repletione occupationis, sed repletione numeri sufficienti.

Paradisi
creatio.Empyreum
caelum.Angelis erga
lum repleta
tum.

**Pulchritudo
paradisi.**

**Lux para-
disi.**

**Amplitudo
Paradisi.
Baruch 3.**

**Mala ibi
nulla.**

cienti & apto numero incolitur ab habitatoribus. Et sicut domus pulchritudo facit ad habitatorum solatum, ita etiam gloria & diuitiae paradisi faciunt ad beatorum gaudium. Si terratum & firmamenti tantus est ornatus, necesse est, ut paradisi decor sit multò maximus: quoniam Deus eum creauit pro amicis suis, maiorem ei pulchritudinem indidit, quam rebus cæteris. Iugis ibi est lux & splendor, non ista, quæ hic est, sed tantò clarior, quanto Sole est lucernâ splendidior. Ibi non est Sol ad lucendum per diem, sed Sol iustitiae in sempiternam lucem. Plenum prorsus omni dulcedinē, dulce lumen, oculis delectabile: videre iustitiae Solēm, Deum & hominem hominis conditorem.

Quoniam damnatis opus est carere angusto, Regibus autem magno palatio, ideo magna est domus Dei, & ingens locus possessio- nis eius: magnus est, & non habet finem excelsus & immensus. Regnum Dei est maius omni fama, & omni laude melius: innumerabilius omni scientia, & omni gloria excellen- tius. Ibi deest omne malum, & adest omne bonum: ibi nihil, quod amatur, deest, sed quicquid desideratur, adest. Facilius possum dice- re, quid ibi non sit, quam quid ibi sit. Nulla ibi est mors, nullus morbus, nulla lassitudo, & nullus luctus: nulla ibi est fames, nulla indigentia, nullus aduersarius, & nulla peccati illecebra. Ibi vita est sine morte, & requies sine labore: summum gaudium sine tristitia, & summa charitas sine discordia: sine cura securitas, & sine deformitate formositas. Quam felix

felix illa ciuitas, in qua iugis solennitas: & quam iucunda curia, quæ curæ prorsus nescia. Nec labor hic, nec senium, nec fraus, nec terror hostium, sed vna vox latitantum, & vnuſ ardor cordium, quia abſterget Deus Apos. 21. omnem lachrymam ab oculis eorum. Ibi æterna ſalutis abundat, & veritas regnat: ibi nec fallit quisquam, nec fallitur: inde nullus beatus elicitur, & nullus miser admittitur. Ibi eft certa ſecuritas, ſecura tranquillitas, tranquilla iucunditas, iucunda felicitas, & felix æternitas in vita illa beatæ ſempiterna, & ſempiternè beata.

IBi prämium eſſentiale (quod eſt de beatitudinis eſſentia, & ſine quo anima non eſt vere beata) conſiſtit in clara Dei viſione. Et hoc fidei prämium eſt, quia quæ hic creduntur per fidem, illuc videntur per ſpeciem. Virtusque autem interioris hominis munus eſt, quia Deus, qui in via per ſpeculum in ænigmate à nobis ſpiritu cognoscitur, in patria facie ad faciem non corporeis oculis, ſed ſpiritu videtur: ſicut & Prophetæ, vbi corpore aberant, ſpiritu multa fieri viderunt: & per ſomnia ſopitis exterioribus ſenſibus, dormientes multa ſpiritu cognoscunt. Et ſicut in ſpeculo ſolam rei im- Speculum in ænigmate. ginem, idqne imperfecte videtur: ita & dum inuisibilia Dei per ea quæ facta ſunt, quaſi per imaginem hic cognoscimus, quaſi per ſpeculum ænigmatice & obſcurè in Dei cognitionem deuenimus: ibi autem inſtar vultibus aduersis ſcīuicem aspicientium, facie ad faciem

clarè

Q.

clarè & nudè videbimus Deum: vnum quidem in substantia, trinum vero in personarum differentia. Quotquot ibi erimus, totam Dei essentiam simul videbimus: sed quia propter suam infinitatem nequit comprehendendi totaliter, ideo ab omnibus non videbitur æqualiter, sed limpidiùs ab uno quam ab altero spirituali visione videbitur, secundum quod unusquisque magis minùsue lumine gloriæ irradiebitur.

Simile.

Lumen glo-
riæ.

Deus vide-
tur clarius
ab uno
quam ab
alio.
Simile.

Sicut enim sol materialis (qui æqualiter sese repræsentat omnium oculis) non videtur sine emissione luminis, vel radii sui in oculum hominis, tamen non omnes æqualiter vident & aspiciunt in illum, sed diuersimodè, secundum quod oculus magis minùsue est dispositus ad videndum: ita & humanæ mentis acies invalida in tam excellenti lumine Dei non figitur, nisi à Deo per creatum infusumque gloriæ lumen fortificetur: sicut scriptum est, In lumine tuo videbimus lumen. Lumen diuinæ substantiæ, videtur in lumine gloriæ, quo naturale lumen intellectus, spiritualisque oculus plus minùsue eleuatur ad cognoscendum Deum, secundum maiorem minorēmque charitatem, quam fertur in eum. Dei igitur species clarius ab uno quam ab altero videbitur, sicut eadem res de longè melius ab uno quam ab altero discernitur, & eadem scriptura à diuersis legentibus diuersimodè intelligitur: quæ diuersitas non prouenit ex parte rei aut scripturar, sed ex parte videntium & legentium distinguuntur prouenire.

Et

Et quia Deus ubique est præsens per eum. Deus non sentiam, ideo ibi non videbitur per distantiam: videtur per distantiam, sed ubicunque erit anima, ibidem Deum videbit per præsentiam. Deum videbit in se, & se in Deo: Denm in aliis, & alios in Deo. Modo quodam ineffabili à semetipsa deficiet & animæ. abibit, totaque in Dei similitudinem & transformationem transibit. Alioqui quo modo Deus omnibus erit, si in homine aliquid de homine supererit? Manebit hominis substantia, sed in alia forma aliaque gloria. Sicut ^{1. Cor. 15,} enim modica aquæ gutta multo vino infusa, à similla. Guta aquæ se tota deficit, vinique saporem & colorem induit. Ferrum candens pristina propriaque ferrum forma exiuit, & igni simillimum efficitur: ignitum. Solis radio aër perfusus in eandem transformatur luminis claritatem: adeo ut non tam Aëris sole illuminatus videatur, quam ipsum lumen: Et radiatus. speculum radiis solaribus directè irradiatum, sole irradiatum. solis in se recipit similitudinem, idque putares alterum esse solem. Ita etiam beati Dei clatitate in intimis suis totaliter penetrantur sicutque deiformes effecti in Dei similitudinem transformantur. Sic affici est deificari, sicut scriptum est, Ego dixi, dii estis: scilicet per participationem, quia unicus est Deus per essentiam: Vos ab eo deificati, ille vos deificans. Iterum alio loco, Cum apparuerit, similes ei ^{1. Ioan. 3.} erimus, quoniam videbimus eum sicuti est. Item alibi, Ut per hoc efficiamini diuinæ consortes ^{2. Petr. 2.} naturæ.

Et sicut videndo speculum, homo videt in Deo beatis ipsum, & multa alia ibidem præsentia: ita & ^{ti se vident,}

Q 2 beatis

beatus videndo Deum, simul & semel vnica visione videt seipsum: & omnia ad beatitudinis **Bona opera.** integritatem sibi necessaria. Videt bona opera, quæ hic peregit, de quorum singulis singula gaudia concipit, nullum bonum manet irremuneratum, sed suum vnicuique merito reseruatum est præmium. **Peccata.** Dimissa sibi peccata sua videt, non ad suam confusionem, sed ad glorificandum magnam Dei misericordiam, per quam dum se à tanta miseria liberatum semper exultat, eam semper magnificeat & ex-

**Conscientia
singulorum
singulis pa-
rent.**

**Vercundia
nulla de
peccatis.
Simile.**

**aduersus
miserias
victoriam
victoriam
victoriam**

**Infernī
visio.
Ab ipsis
beatis.**

altat. Vnde enim Deo gratias agere deberet, nisi, vnde id faceret, in memoria haberet: Si ibi tanta est consolatio de remissis peccatis, quantum putas est gaudium de operibus bonis? Cùm singulorum conscientiæ singulis pateant, tamen non magis eum pudet suorum scelerum, quām hominem pudet sanctorum vulnerum: nec magis quām grandæus erubescit, de iis quæ adhuc infans in cunis egit: sicut nec Petrus confusione est negatio trina, nec Magdalena & aliis multis dimissa sibi peccata. Et licet beatis sua gaudia abundè sufficient, tamen ut de sua liberatione vberiores gratias Deo agant, ad videndum reproborum pœnas non loco, sed intelligentia, & in Deo visione manifesta, egrediuntur, nec tamen iis vlo modo compatiantur. Sic quippe eorum mentes aquissimo iudici inhærent, vt omnino eis non libeat, quicquid à Dei voluntate discordat: quia vident Deum simpliciter velle reproborum damnationem, ideo lætantur iusti, cùm Dei vident vindictam & iustitiam.

Quod

Quod si Prophetæ, dum adhuc mortales essent, multa præterita, præsentia, & futura potuerunt cognoscere: quanto magis Deus, qui liberum & voluntarium est speculum, quæ, quibus & quando vult, potest repræsentare: unde plus sciunt etiam vetulæ in illa gloria, quam omnes Philosophi scire potuerunt in hac vita. Ibi cognoscunt quo modo pater filium sibi Trinitatis coæqualem genuit, & quod ab utroque utriusque coæqualis Spiritus sanctus processit, & quod pater nec filium nec Spiritum sanctum temporare, sed origine præcessit. Quid ibi nesciunt, qui scientem omnia sciunt? aut quid non vi-
bet eis Deum aspicere, semper habere, semper possidere, semper puro mentis intuitu videre gloriæ illius decorem, & regiæ potestatis honorem. Mirantur & deficiunt in illum, quem prospiciunt: fruuntur nec fastidiunt, quo frui magis sitiunt. Tantò à possidentibus magis desideratur, quanto à desiderantibus magis possidetur. Ex abundantissima plenitudine summi boni satiantur, & ex continuato desiderio fruitionis non satiantur, satietas simul est & esuries, illa indigentiam tollit, hæc fastidium excludit. Mille anni in fruitione Dei, tanquam dies hæsterna, quæ præteriit.

Deus tam delectabilis est ad videndum, tam suavis ad habendum, & tam dulcis ad fruendum, ut continua eius visio nullum eis fastidium pariat, immo etiam quod de ea in æternum securi sint ad eorum beatitudinem ac-

Q 3 cedat:

In Deo beatitudini multa cognoscunt.

cedat: Beatifica Dei fruitio sine fine, continua delectatio sine interruptione, æterna possessio sine amissione, & secura tentio sine dubitatione spei succedunt: quia beati eo fruuntur, quo aliquando frui sperarunt. Tunc demum satiantur eorum desideria, dum eis apparet Dei gloria. Deus, qui finis est omnium desideriorum, solus satiare potest corda eorum: extra eum nihil quæritur, quia in eo est, quicquid desideratur. Facti socii Angelorum, & participes regni cælorum, cum Christo Rege regnant, & nihil concupiscendo omnia possident: sine avaritia dñites, & sine pecunia locupletes. Si dulciores sunt in hac vita lachrymæ pœnitentium, quam omnes deliciæ diuitum: si etiam hic tam iucundum est pro eo flere, quam putas iucundum erit cum eo gaudere: Si cælestium gaudiorum tenuis quædam degustatio hic est adeò delectabilis, quantum putas beati illuc habeant sinceræ delectationis, dum pleno ore gustant & vident, quam suauis est Dominus? Tantam summi boni fruptionem amittere non formidant, alioqui vere beati non essent: æternæ illius ciuitatis æterna sunt gaudia, vbi securi sunt de immarcessibili sua gloria: quæ nec variabitur, nec labetur, quia incommutabili pace potentur. Nullus enim fortior superueniet, qui eos inuitos inde eiiciet, nec Deus qui est summum bonum, iis volet subtrahere seipsum: ut pote qui amoris vinculo indissolubili eos amet plusquam ii seipso, & ii Deum plusquam seipso.

Deus finis
desiderio-
rum.

Securitas
beatorum.

Et

ET sicut aliud est aliquid videre, aliud possidere, aliud diligere: quia multa videmus, quæ non possidemus, & multa possidemus quæ non diligimus: ita etiam tres sunt dotes distinctæ, tria præmia & tres gloriæ: clara Dei visio, quæ succedit fidei: secura fruitio, quæ succedit spei: & perfecta eius charitas, quæ nunquam excidit, quia etiam in cælo persistit. Fidei & spei iam res ipsa, non quæ credatur & speretur, sed quæ videatur te- neaturque succedit. Charitas autem (quæ il- lis maior est) contemplata, quod credebat, & adepta, quod sperabat, non euacuat, sed per- ficitur & augetur. Si credendo & sperando id adeò diligimus, quod nondum videmus, & quò nondum peruenimus: quantò magis id di- ligemus, dum videbimus & eò perueremus? in illa charitatis plenitudine, præceptum illud de diligendo Deo ex toto corde, ex tota ani- ma, & ex tota mente, adimplebitur: dum to- tus homo concupiscentiis carnalibus sicuti & nunc nullo modo præpeditus, totaliter & in- cessanter in Deum feretur: dum ineffabili qua- dam suavitate beati diligent Deum plusquam seipso, & se inuicem tanquam seipso.

Omnibus vna erit voluntas, quia ibi nul- la erit nisi Dei voluntas: sicut non aliud vo- lent quam Deus volet, ita & quicquid nolent, Deus nolet: & sicut Deus potest, quicquid vult, per seipsum, ita & quicquid volent, poterunt per Deum. Vna Ecclesia, vna Christi sponsa, & vnum corpus sunt, quotquot ibi sunt. Quo modo autem caput à corpore, aut corpus dis-

Q 4

cre-

Ocularum
concordia.

Præmiorum
diuersitas.

1. Cor. 15.

Inuidia ibi
nulla.

crepabit à capite? sicut oculus vnuſ verti non potest, quò & alius non vertatur: ita & quicquid vnuſ voluerit, eò aliorum omnium voluntas conuerteretur. Sicut etiam oculus non vellet esse manus, nec manus vellet esse oculus: ita etiam licet differt ab inuicem differentibus meritis, tamen singulis sua præmia sufficientia sunt, & iam perfecti amplius suis præmiis capere non possunt: vniuersusque beati capacitas est completa, nec quid ultra desiderat, intelligens se non ultra meruisse, imò etiam se ultra meritum accipisse. Alia est claritas solis, id est, Dei, qui est sol iustitiae: alia claritas lunæ, id est, Mariæ virginis: alia claritas stellarum, id est, omnium beatorum tam Angelorum quam hominum. Stella enim à stella, id est, electus ab electo differt claritate animæ & corporis: sicut stellæ diuersæ sunt claritatis in firmamento, ita & beati diuersas mansiones sortiuntur in regno. In domo patris nostri multæ sunt mansiones, id est, multæ præmiorum differentiæ & variæ dignitates. Sicut enim reprobi differenter puniuntur in inferis, ita electi differenter præmiantur in cælis. Aliqui Dei speciem clarius contemplantur, in ipsa contemplatione delectabilius ea fruuntur: & in ipsa fruitione in eius amorem ardentius accenduntur quam alii, secundum quod plura aut maiora bona opera peregerunt quam ipsi.

Nec tamen inferior innidet superiori, sicut nec Archangelis inuident Angeli, non est inuidia imparis claritatis, in quibus regnat unitas charitatis. Quoniam singuli alios omnes si-

cut

cut seipsoſ diligunt: ideò bona singulorū, per charitatēm fiunt omnium, & vnuſquisque quod in ſe non habet, id ſe in alio accepiffe gaudet. Quantum igitur, putas, erit gaudium, in illa perfecta charitate innumetabilium Angelorum & hominum? quia nemo minùs aliū quam ſeipſum amabit, non aliter pro ſingulis aliis quām pro ſeipſo gaudebit. Et certè ſi aliquis aliū, quem omnino ſicut teipſum diligeres: idem ſicut & tu haberet beatitudinis præmium, duplicaretur gaudium tuum, quia non minùs pro eo quam pro teipſo gaudeſeris. Si verò duo, tres, aut plures idipſum haberent, quo modo putas cor tuum, quod de tanto ſuo bono vix caperet gaudium ſuum, capax eſſet tot tantorumque gaudiorum? Quot igitur & quanta gaudia quisque beatus habet, qui de Dei gloria plusquam de ſua gaudet? & de ſingulis, quos non minùs quām ſeipſum amat, non minùs quām de ſua gloria exultat? quod si creature capacitas caperet infinitum, ſingulorū profectō infinitum eſſet gaudiu: immensum tamen eſt, ineffabile & incomprehensibile, ſecundūm capacitatēm vniuſcuiusque animae. Gaudet ſupra ſe de fruitione Dei, in- Cæleſtem hæreditatem intra ſe de euafione inferni, intra ſe de ſua glo- cohæredes rificatione & beatitudine. Quorum multitu- non angu- do hæreditatem illam, in qua cohæredes ſunt, do- tiant.

non minuit, nec in ullo anguſtiorem reddie: tanta eſt multis, quanta paucis: tanta ſinguliſ, quanta omnibus, quia omnibus vna eſt, in tota ſingulis: imò etiam tanto largior, quanto cohæredum multitudo eſt numerosior.

Q 5

Ibi

Christiglo-
ria.

Maria Vir-
ginis gloria.

Angelorum
Ordines.

Apostoli.

Ibi Christus Dominus & Deus noster, secundum Deitatem, qua Deus est, sedet ad Dei patris dexteram, id est, in gloria coæquali, in maiestate non dispari, in essentia consubstantiali, & in æternitate non posteriori. Secundum verò creatam humanitatem, id est, corpus & animam suam, etiam sedet ad Dei Patris dexteram, id est, in maxima post Deum gloria & beatitudine, in qua post Deum pulchriùs, & iucundiùs est eum videre. Ibi beatissima Virgo Maria, in corpore & anima super omnes Angelorum choros sublimata, post filium suum in gloria est gloriosissima. Ibi beatorum spirituum alii superiores, alii inferiores per Dei sapientiam sunt constituti, & sub tribus Hierarchiis in nouem ordines distincti: non locorum differentiâ, sed virtutum & gratiarum distantiâ. Nam quos Deus creauit substantia magis subtile & spirituales, intellectu magis perspicaces, & voluntatis facultate magis liberos & habiles, sicut aliis superiores creati sunt donis naturæ, ita & in gratia confirmati aliis superiores effecti sunt donis gratiæ. Quæ omnia inæqualiter insunt omnibus, quia superiores Ordines ea possident aliis excellentiùs: quibus respectu aliorum donorum perfectiùs sunt prædicti, ab iis sunt Ordines denominati: Seraphim, Cherubin & Throni, Dominationes, Principatus & Potestates, Virtutes, Archangeli & Angeli: sed in uno Ordine non omnes sunt æquales, sicut & in Ordine Apostolorum & Martyrum alii sunt aliis excellentiores. Ibi iudex Apostolorum chorus. Ibi laudabi-

dabilis Prophetarum numerus. Ibi Martyrum Prophetæ.
Martyres. victor exercitus, ob certaminis & passionis corona laureatus: tanto illic lætior, quanto hic pro Christi nomine durius afflictus. Ibi Confessores, fessorum constantia præmii sui perceptione consolata. Ibi triumphantes Virgines: quæ carnis concupiscentiam subegerunt per continentiam.

Ibi turba magna, quam dinumerare nemo potest, ex omnibus gentibus & tribubus & populis & linguis: qui omnes benedicunt Dominum in omni tempore, semper laus eius in eorum ore: exultationes Dei in gutture eorum, Deum sine fine laudantium & dicentium, Sanctus, Sanctus, Sanctus, Dominus Deus Sabaoth. Ibi melodiæ sine fine cantantur, ibi melliflua hymnorum organa semper audiuntur, ibi omnis varietas in multiplici harmonia Deo concinuitur. Breuiterque in æterna illa beatitudine, qui est status bonorum omnium aggregatione perfectus, bona omnia suis contrariis sunt impermixta, & ultimata consummatione perfecta. Vnde tanta ibi est felicitas, & tanta pulchritudo, tanta iucunditas & tanta iubilatio: ut si illuc non amplius quam vnius diei mora licet manere, propter hoc solum innumerabiles voluptatis dies hic deberes contemnere. Illi comparata omnis aliunde suauitas dolor est, omnis iucunditas mœror: omne dulce amarum, omne decorum fœdum, & quicquid aliud delectare potest, molestum. Tanta ibi est Deo obediendi suauitas & facilitas, quanta cum eo regnandi viuendique est felicitas.

Non-

*Animarum
nondum est
perfecta glo-
ria.*

Apocal. 6.

Esaiæ 61.

*Resurgen-
tium corpo-
rum quanti-
tas.
Ephes 4.*

*Resurgen-
tium corpo-
rum inte-
gritas.*

Nondum tamen beatarum animarum con-
summari potest beatitudo, perfici gloria & com-
pleri lætitia: adeò eas urget naturale illud de-
siderium resurrectionis & corporum suorum
glorificationis. Homo nondum erit integer,
cui integra beatitudo detur, priusquam nume-
rus conseruorum & fratum eius compleatur.
Ante resurrectionem stolas singulas acceperunt,
quia adhuc animæ solius perfruuntur beatitu-
dine: postea binas accepturi sunt, quando
etiam corporum vestientur incorruptione: In
terra sua duplia possidebunt: quando cum
felicitate & requie animarum resurgent ad im-
mortalitatem & gloriam corporum.

Omnis in quacunque ætate fuerint mor-
tui, resurgent in virum perfectum, in mensu-
ram ætatis plenitudinis Christi. Non quidem
in mensuram staturæ eius: sed sicut Christus,
natus triginta duos annos & tres menses, in iu-
uentutis flore mortuus est & resurrexit: ita
etiam illi in eadem corporis & iuventute &
mensura resurgent, quam circa eos Christi an-
nos homo naturæ perfectæ habere solet. Ille
qui de nihilo fecit, quod voluit, supplebit ma-
teriam quæ defuerit, aut eam per totum cor-
pus disperget, si in una parte superabundaue-
rit enormiter. Nihil erit deformis, nihil inde-
corum, quia resurrectio damna reparabit cor-
porum, quibus æterna erit vita sine morte, &
perpetua iuventus sine senectute: per tot sæ-
cula flos ille iuventutis non violabitur, quia
corpora membris omnibus instaurata immar-
cessibili sanitate potentur. Tamen sicut Chri-
stus

stus resurgens à mortuis, retinuit plagas suæ passionis: ita & martyres, in suo corpore martyrii sui habebunt cicatrices in quo nulla ine- Martyrum cicatrices.
rit deformitas, sed martyrii in eo relucebit au- Notandum.
reola & dignitas. Quæ quia non est de bea-
titudinis essentia, & sine ea adhuc anima esset
verè beata: ideo ipsis est accidentale præmium, Accidentale præmium.
quod pro obiecto bonum habet creatum: si-
cut & corporis dotes, quæ sequuntur.

BEATORUM corpora hic seminantur, & per na- Impassibili- tas, prima dos corpo- ris.
turam generantur in corruptione, surgent autem in incorruptione: quia incorruptibilia, 1. Cor. 15.
impassibilia, & immortalia. Omnis fragilitas ac labes terrena ab iis euacuabitur, & in cælestem puritatem ac stabilitatem conuertetur:
non enim cum summo bono, qui Deus est, malum aliquod esse potest. Vnde si etiam es-
sent in inferno, non laderentur, sicut Ananias, Daniel. 3.
Azarias, Misaël in fornace ardenti non lade-
bantur, sicut etiam solis radius non comburi-
tur aut secatur.

SEMINANTUR in ignobilitate, quia vilia, ope- Claritas se- cunda dos.
ra, & sine omni honore, surgent autem in gloria: quia gloriosa, luminosa & translucida. Gloria animæ redundabit in corpus, sicut per crystallum solis relucet radius: vnde & secun- dum differentiam gloriæ animarum, differens erit claritas corporum: quæ tantò erunt sole clariora, quanta terrenis præstant cælestia. Si- mul & claritate fulgebunt, & puritate translu- cebunt. Ipsa etiam corporis harmonia omni- um

um oculis patebit, & unusquisque erit conspiciabilis alteri, sicut nunc non potest esse conspicibilis sibi ipsi. Quantus fulgor, quanta claritas, quanta pulchritudo erit in illa gloria, ubi innumerabilia erunt corpora gloriosa?

Subtilitas;
tertia dos.

Corpus glo-
riosum o-
mnia pene-
rat.

Corpora
vera erunt.

Sensus ex-
terioribus.

Seminantur in infirmitate, surgent autem in virtute: quia subtilia, penetrabilia, & quicquid volent, cuertere valentia. Per gloriam ita auferetur grossities corporum, ut nulla clausura, nullumque obstaculum possit impedire, quin liberrimè omnia possint penetrare: sicut & solis radius pertransit vitrum. Cuius rei exemplum in corpore Christi præcessit: quod exiuit clauso Mariæ Virginis vtero, & clauso resurrexit sepulchro: quod ad discipulos suos clavis ianuis intravit, & cælos sine eorum dilaceratione penetrauit. Sicut etiam anima nunc est cum suo corpore, & candens ferrum cum igne: ita & corpus gloriosum etiam cum non glorioso poterit esse. Corporum spirituallium talis erit subtilitas, ut etiam in eis serueretur carnis & ossis veritas: nec corpora esse deſſiſtent, quæ ſpiritu viuificante ſubſiſtent. Quoniam vera erunt corpora, non vana aut phantatica: tangi poterunt & impellenti resistere: latere etiam poterunt, quia per subtilitatem ſpiritualis potentiae humani tactus organum poterunt penetrare. Sicut anima ibi habebit suos sensus interiores, ita & corpus habebit suos sensus exteriores. Viſus reficitur in contemplatione Christi humanitatis: & auditus, in audienda melodia laudis Dei vocalis: in

Deo

Deo anima tanta delectatione inebriabitur interius, ut delectari non indigeat in aliis sensibus exterioribus. Deus etenim erit omnia in omnibus, erit speculum visui, cythara auditui, mel gustui, balsamum olfactui, & flos delectabilis tactui.

Seminantur corpora animalia, quia grauia & Agilitas tarda ad exequendum animæ desideria; quarta dos. surgent autem spiritualia, non quòd vertantur in spiritum, aërem aut ventum (spiritus Luc. 24. enim carnem & ossa non habet) sed quia instar spiritus agilia erunt, leuia & velocia, nec magis ad deorsum quam ad sursum proclivia. Caro spiritui seruiens spiritualis dicitur, quia spiritui summa obtemperandi facilitate subditur, ubi enim volet spiritus, statim ibidem erit & corpus. Quam citò sol oriens occidentem suo radio tangit, & visus sursum respiciens stellas pertingit: quanta etiam velocitate Angeli & anima seipso mouent sine corpore, tam velociter anima poterit corpus suum de cælo ad terram, & de terra ad cælum mouere. In quo motu non fatigabitur: & quia subtile erit, propter medii resistantiam non retardabitur. Imò etiam quicquid voluerit, mouere aut euertere poterit: nec in eo maiori laborabit co- natu, quam nos modò in oculorum motu, quocunque iuerit, semper & què felix erit, quia Deum semper præsentem habebit. Tanta agilitas grata erit & iucunda, non quòd sit ei necessaria, aut quòd adsit propter indigentiam, sed tantùm ad nobilitatis suæ ostensionem: sicut

&c

Fortitudo
beati.

& nos non utimur omnibus perfectionibus
quas habemus, & quas habere gaudemus.

psalm. 30.

Paradisi
gaudia in-
comprehen-
sibilita.

1.Cor. 2.

Quàm magna multitudo dulcedinis tuae,
Domine, quam præparasti timentibus te? ô
quantum nos amas, qui nos miseris ad tan-
tam gloriam reseruas? Gloriosa dicta sunt de
te, ô ciuitas Dei, tamen possibilius mihi esset
omnes stellas cæli numerare, totumque mare
in paruo vase comprimere, quàm minimam
partem beatitudinis vnius animæ exprimere.
Eius tot & tanta sunt gaudia, vt omnes ari-
thmetici non possent ea numerare, nec omnes
geometræ mensurare, nec omnes Rethores ea
sermone explicare. Non solum eloquii no-
stri excedit facultatem, sed etiam intelligentiæ
nostræ capacitatem: verius cogitatur, quàm di-
citur, & verius est quàm cogitatur: quicquid
de ipsa cogitare aut estimare potest, minus
ipsa est, quia oculus non vidit, nec auris audi-
vit, nec in cor hominis ascendit, quid præpa-
rauit Deus diligentibus se. Fide non capitur,
spe non attingitur, charitate non comprehen-
ditur, quia omnia desideria & vota transgredi-
tur: acquiri potest, estimari non potest: plus
enim illic est adeptura charitas, quàm fides
credidit, & spes desiderauit, maiora sunt Dei
præmia, quàm Sanctorum desideria. Tanta si-
quidem est dulcedo cælestis patriæ: vt si una
eius guttula in infernum defueret, totam da-
mnatorum amaritudinem dulcoraret: si Deus
in inferno à damnatis videretur, infernus in
amœnissimum paradisum conuerteretur. Ex
hoc euidenter ostenditur, quantum & quale bo-
num.

num Deus est, quod nulli ab eo recedenti
bene est.

REdeamus tandem ad nos, & quasi de cæ-
lo descendentes paulisper nostra videa-
mus. Putamusne, in domum Domini ibimus?
quid sumus, ut illuc eamus? mortales & abie-
cti, terra & cinis: sed qui promisit, Pater no-
ster est, & Deus omnipotens. Nonne potest fa-
cere Angelum ex homine, qui fecit hominem
ex puluere: vita homines, sed spe Angeli su-
mus, quibus in patria similes & æquales eri-
mus. Mercator dum quidquam emit, & iam
aliquid pignus recepit: tametsi merces suas
nondum habeat, eas tamen iam se habere re-
putat. Deus pater suam nobis gloriam pro-
misit, in pignus & arrabonem interim, & fi-
lium suum nobis in Eucharistia dedit, & san-
ctum suum Spiritum cordibus nostris infudit:
illic reuelata facie lætius & securius eundem
videbimus, quem hic in Sacramento fructuo-
sius & mirabilius sumimus. Tu verò illuc per-
uenire desperas, & paternæ hæreditatis pro-
missionem non expectas? nihil tibi grauius
& molestius, quam afflictionem sæculi præter-
euntis perferre, & ad mentis tuæ releuationem
gaudia munerationis non sperare.

Ipsa spes peregrinationi est necessaria, ipsa
est, quæ consolatur in via; viator enim, qui am-
bulando laborat, ideo laborem patienter tole-
rat, quia tandem peruenire sperat: tolle ei
spem perueniendi, continuò franguntur vires
ambulandi. Medicus expromit ferrum ad se-

R canda

Arrabo bea;
titudinis,

Psalm. 86.
Desperatio-
ne nihil mo-
lestius.

Spes viato-
rum neces-
saria.

Simile.

canda vulnera: & dicit ei quem secturus est, patiens esto, sustine, tolera. In doloribus exigit patientiam, sed post dolores promittit sanitatem: ægrotus autem nisi sanitatis spem sibi proponeret, in dolore quem patitur, deficeret. In agone positis spes coronæ vulnerum mitigat dolorem, ita & iugum Domini portantibus spes gloriæ miram parit consolationem: animum in Deum erigit, & mala, quæ exterius tolerat, interius non sentit.

Spes tem-
poralium
fallax.

Spes de Deo
scirax.

Ecclesiastes

Non paruam iucunditatem affert spes, cuius postea erit res: Temporalia non habita angunt, habita autem vilescent. Amas uxorem non ductam, sed adhuc ducendam, & fortè ducenda amatur, quæ ducta odio habebitur: quare hoc? quia certè talis non apparuit ducta, qualis ab animo pingebatur ducenda. Deus autem qui amatur absens, non vilescit præsens: plus de eo inuenit adeptio, quam de eo formabat cogitatio: plus amabimus, dum eum viderimus, si eum potuimus amare, antequam videremus: ardentius diligitur adeptus, quam desideratus. Nisi prius ametur, postea non habebitur: porrò si amatur, non ideo habetur, necesse enim est, ut super omnia diligatur. Vanitas vanitatum & omnia vanitas, quam magna est miseria creatorem amittere pro creatura. Huius mundi sequi naufragium, & non magis ad Dei Sanctorumque eius conuolare contubernium: vacareque & videre, quam suavis est Dominus, & quam magna multitudo dulcedinis eius. Si considerares, quæ & quan-

quanta tibi promittuntur in cælis, vilescerent
tibi omnia, quæ habentur in terris.

Cur igitur, frater charissime, in cælum
non curris? Vbi Deum sine fine videbis, sine
amissione possidebis, & sine fastidio amabis?
Magnus numerus parentum, fratrum, sororum
& amicorum tuorum te illic expectat, frequens
& copiosa turba illic te desiderat: iam de sua
beatitudine securi, & de tua salute solliciti. Quo-
rum societate ne priueris, omnia tibi agenda
sunt, non est onerosum, si attenderis. Tan-
tum age pœnitentiam, & appropinquabit tibi
regnum cælorum: quò nos perducat, qui sine
fine viuit & regnat. Amen.

SEXTÆ PARTIS CONCLVSIO.

OB hæc & multa alia, quæ in hanc sen-
tentiam dici poterant, planè vides, fra-
ter charissime, quam bonus est Deus,
& quam facilis peccata remittere: quanta apud
eum est misericordia, & peccatis redemptio co-
piosa. Cuius bonitatis diuitias considerans Psal-
mista, Deum non solum dixit misericordem, sed
eum ipsam vocavit misericordiam. Tu Deus (in-
quit) susceptor meus es, Deus meus misericor-
dia mea. Perpende diuinæ pietatis finum,
considera apertum tibi diuinæ misericordiæ
gremium, & noli desperare, noli te ipsum de-
iicere, noli mœrore desicere, patet tibi æra mi-
sericordiæ, & tu te vertis ad vincula dementiae?

R. 2 ap-

Diabolus
curfaciat
desperare.

Spes sine
timore pe-
riculosa.

Nota di-
cum,

aperitur tibi thesaurus diuinæ bonitatis, & tu profugis in barathrum miserandæ desperatio-
nis? Deus te inuitat ad pœnitentiam, tibi of-
fert paratam veniam: porrigit tibi auxilii sui
dextram, & auertis faciem? reseratur tibi cæ-
lum, & tu te proripis ad infelicem laqueum,
& ad inferni præcipitium? Diabolus sciens pœ-
nitentiæ virtutem, te in hanc induxit despera-
tionem, spem tibi abstulit, quæ est fundamen-
tum & anchora nostræ salutis, & dux nostri
ad Deum itineris. Quod si diaboli laqueos
euadere cupis, & in spem te erigere, tantum
recede à malo & fac bonum, & habebis spem
salutis: bona etenim opera faciunt sperare, ma-
la verò desperare: prima salus est declinare
culpam, secunda verò, eius sperare veniam.

Quæ spes diuinæ misericordiæ non suffi-
cit ad salutem sine timore eius iustitiæ: incas-
sum Dei misericordiam speraueris, nisi etiam
eius iustitiam pertimueris. Deus enim qui mi-
sericors est, iustus simul est: considerans quām
misericors est, noli desperare: considerans quām
iustus est, noli peccata tua negligere. Nihil
securius, quām sub spe timere, & spem timori
coniungere: ne fortè incauta mens, aut sese
in vitiis per desperationem deiiciat, aut per
præsumptionem corruat. Timendum est, ne in
aliam voraginem incurras, & moriaris de mi-
sericordia Dei præsumendo, qui mori non po-
tuisti de ea desperando: habeásque in corde
tuo cogitationes à prioribus quidem diuersas,
sed tibi non minus peruersas, & rursus in cor-
de tuo dicere incipias: Quacunque hora inge-
muero,

muero, omnium iniquitatum mearum non recordabitur Dominus: quare igitur conuertar hodie, & non cras? Sed quid, frater charissime, si ante crastinum erit finis tuus? qui pœnitenti tibi tantam spondet misericordiam, peccanti tibi non promittit crastinum diem. Metuendum est, ne dum ad finem differtur conuersio, incerta mors citius præueniat, quam pœnitentia subueniat. Ne sic sperando augeas peccatum, datus tibi est dies mortis incertus: rursus etiam ne desperando augeas peccatum, datus tibi est pœnitentiæ portus. Quæ etsi in fine dierum bona est: melior tamen est, quæ longè ante finem agitur, vt ad vitam illam beatam securius transeat, ubi Deum sine fine videbimus, amabimus & laudabimus in sæcula sæculorum. Amen.

PARAENESEOS AD POENITENTIAM CONCLVSIQ.

Deo optimo maximo cœptis nostris aspirante, conatusque nostros adiuuante, pro ingeniali nostri modulo obiectiōnibus tuis vtcunque satisfecimus, frater in Christo charissime. Iam iam receptui canendum est, supremaque manus instituto operi admouenda: si prius id te monuero, ne committas, vt cum hæc parænesis tui causa ad plures peruererit, quos & ad agendam pœnitentiam adduxerit, & solito meliores reddiderit: tibi omnium vni nihil contulerit, nihilque adue-

R 3

xerit

xerit emolumenti: durumque cor tuum non plus emolliuerit, quam si dura silex, aut stet Marpesia cautes. Sicut enim corpori exitiale est corporalem cibum non posse percipere, ita animae perniciosissimum est spirituales delicias fastidire. Vt cunque rescadat, tu ipse videris, anima tua in manibus tuis.

Adulato-
rum consi-
lia.

Sua Scripto-
ris accusa-
tio.

Scio equidem, quod dum haec mea pa-
rænetica Epistola tibi reddita fuerit, eam con-
uocatis amicis tuis ostendens, & de vita tua
caussa à fautoribus, mortis consilium quæres:
qui dum non te, sed res tuas diligunt, omnia
tibi ad assentationem dicunt: quorum consi-
lia vel tuo ipsius iudicio te perdiderunt, & ad
tantam peccandi licentiam perduxerunt. Qui
vt à sano meo consilio in peruersam suam te
auocent sententiam, de meo, sat scio, tibi dicent:
quod in oculo tuo video festucam, in meo au-
tem non video trabem: quod te laudabilem
vitupero, & me vituperabilem collaudio: quod-
que aliis medicinam adhibeo at ipse viceri-
bus scateo. Ingenuè & ex animo profiteor,
frater charissime, quod manus illæ mundæ es-
se debent, quæ alios volunt mundare, lucem-
que videre debet, qui de tenebris vult iudica-
re: cuiusmodi non sum. Pulchrum etenim
depinxi hominem turpis pictor: atque utinam
sic quotidie viuerem, vt intra meipsum accusa-
tricem conscientiam non haberem! Te au-
tem ad pœnitentiæ littus dirigo, qui adhuc in
peccatorum sordibus fluctuo: circa vitam tuam
sum austerus, & circa vitam meam benignus:

cum

cum potius deberes me audire parua leuiaque
mandantem & magna arduaque facientem.

Veruntamen ille qui præcepit: Quæ dicunt, Matth. 23.
facite, quæ autem faciunt, nolite facere: ipse
inde prohibet sana iniustorum consilia negli-
gere. Et quandoque olitor opportuna lo-
catus. Etenim sicut bonus Dominus mali
serui ministerio bonam facit eleemosynam: ita
& per me, licet impœnitentem, misericors Do-
minus te reuocare voluit ad pœnitentiam.
Quoniam autem loquendi authoritas perditur,
quando vox opere non adiuuatur: illa quo-
que vox libentiūs auditorum corda penetrat,
quam dicentis vita commendat. Idcirco ut
quod voce prædico, opere expleam, aliosque
erigendo, ipse à peccatis meis resurgam, o-
mnes tam legentes, quam audientes, qui ex his
laboribus nostris animæ suæ fructum retule-
rint, obnixè rogo atque obtestor, ut pro mea

Scriptoris anima dicant, Pater noster &
Aue Maria.

F I N I S.

